

Poch tarang wüx nawiig San Pablo müüch mondüüb Teat Cristo monlüy tiül cambaj Roma

ROMANOS

Pablo atepeay mondüüb Teat Cristo tiül Roma

1 Xique nenütiüs Pablo nerangas minajiüt Teat Jesucristo. Teat Dios tayac xic narang miapóstol nej, namb nasaj meáwan nipilan wüx aaga najneaj nanderac nguineay alndom mawüw wüx asoetiwi nejiw.

²Aaga najneaj nanderac quiaj, aag ayaj tanomb Teat Dios lamapiüing apmajlüy, lamarangüw wüx nawiig ajcüw mondeac andeac nej. ³Aaga leawa lamapiüing Teat Dios quiaj, aag ayaj apiüing wüx Miteatiiüts Teat Cristo, micual nej. Teat Cristo tajlüy nipilan nej, micual micualüw David. ⁴Tajüic naleaing Micual Teat Dios nej cos alndom marang cuajantanej, y cos Nangaj Espíritu ocueaj Teat Dios tapacüüch nej imiün tiül mondeow. ⁵Nej lamambeol xic xeyay, lamüüch xic narang nop miapóstol nej namb nasaj nipilan tiül meáwan cambaj wüx iüt mayariw nej andeac, mandüümüw nej. ⁶Icona aton ijlüyiün tiül ajcüwa nipilan quiaj, cos Teat Dios lamayamb

icon müüch icon mejlüyiün tiül minipilan Teat Jesucristo.

⁷Xique sarang aaga nawiig cam nüüch icon leawa iliün tiül cambaj Roma, cos Teat Dios ajiür icon lasta, aag tayamb icon mejlüyiün micual nej. Miteatiiüts Dios y Teat Jesucristo mambeol icon, müüch icon monajneaj tiül imeajtsan.

Pablo andiüm mamb tiül cambaj Roma

⁸Xique süüch gracias Miteatiiüts Dios wüx minüt Teat Cristo por meáwan icona, cos tiül meáwan cambaj andeacüw nguineay icona ngo mechiwean imeajtsan wüx Teat Dios. ⁹Teat Dios ajaw xique ngo nacueat natün ocueaj nej mambeol icon. Xique xeyay apac ximeaats narang minajiüt nej; cos xenajiüt, aag ayaj nasaj nipilan nguineay lamarang Teat Cristo. ¹⁰Xique ngo nacueat natün ocueaj Teat Dios malüy alndom namb najaw icon, sitiül nej andiüm. ¹¹Sandiüm namb najaw icon nasaj icon wüx noic mimonajneaj Teat Dios, leaw Nangaj Miespíritu nej alndom müüch icon, mapac imeajtsan

wüx nej. ¹²Aag ayaj sasaj icon cos sandiüm membeolayoots mayacaats omeajtsaats wüx Teat Dios.

¹³Xecojow xechijquiaw, sandiüm menguiayüün nguineay xique xeyay sandiüm namb najaw icon, nambeol icon wüx Mipoch Teat Dios, atnej sarang tiül pälwüx nipilan tiül meáwan cambaj. Pero ajlüy cuane mepal xic ngondom namb. ¹⁴Xique netam nasaj meáwan nipilan nguineay apiüng Teat Dios, masey nipilan griego, masey pälwüx nipilan, masey nipilan mondüy nawiig, masey nipilan ngo majaw xeyay. ¹⁵Xique sayaag atnej lango nafüc wüx sandiüm namb nasaj icon aton monlüy tiül Roma, wüx aaga najneaj nanderac nguineay alndom maw asoeteran.

Aaga najneaj nanderac alndom mawün wüx nipilan

¹⁶Aaga najneajay nanderac leawa lamapiüng Teat Cristo, ngo naxing nandeac wüx, cos aag ayaj alndom mawün wüx asoet meáwan nipilan leaw apmayar, ombas nejiw a nipilan judío, condom aldemas nipilan ngome judío. ¹⁷Tiül aaga leawa lamapiüng Teat Cristo quiaj, ajawaats nguineay nej alndom mawün asoetiüüts, majlүйiüüts ocueaj nej: aag ayaj sitiül mapiüngaats tiül omeajtsaats aag ayaj naleaing, ngo machiweaats omeajtsaats. Cos apiüng tiül Mipoch Teat Dios: “Sitiül aljane naleaing neyar andeac Teat Dios, aag ayaj apmapac”, aw.

Leaw ngo majneaj arangüw nipilan

¹⁸Ajawaats nguineay Teat Dios imiün tiül cielo, apmajcüy majaw

meáwan nipilan leaw ngo mayar nej andeac, leaw nerang ngo majneaj. Nejiw ngo mayariw leawa naleaing, cos andiümüw marangüw ngo majneaj. ¹⁹Leaw alndom majaraw wüx Teat Dios, nejiw ajawüw. Cos Teat Dios lamüüch nejiw majawüw aag ayaj. ²⁰Cos nde wüx Teat Dios tarang a iüt cam, quiaj tajüic naleaing nej almajlüy, at alndom marang cuajantanej meáwan nüt masey nej ngo maxoram majaraw. Cos wüx meáwan leawa Teat Dios lamarang, nipilan alndom majawüw nej almajlüy. Quiaj nejingüind ngo majiür cuane apmewüyay wüx. ²¹Masey ajcüwa nipilan quiaj ajawüw naleaing Teat Dios almajlüy, nejiw ngo mapiüngüw najneaj tarang, at ngo müjchiw gracias Teat Dios. Ingow ayambüw Teat Dios, nejiw alomboochayej, ayambüw leaw ngo metam. Quiaj nómban ngondom mayaciw omeajtsüw wüx leaw najneaj. ²²Nejiw apiüngüw ajiürüw xeyay fis, pero naleaing nejiw xeyay nechachiw. ²³Cos ingow müjchiw omeajtsüw Teat Dios leaw almapac, mapiüngüw najneajay ajlüy, nejiw üjchiw omeajtsüw leawa narangüch dios ngome almapac; ajlüyiw atnej nipilan. At üjchiw omeajtsüw narangüch dios, aag atnej quiec, atnej nimal nejiür piquiw oleaj, atnej nimal nesatatüy tiüt ajüy.

²⁴Áag tacueat nejiw Teat Dios marangüw meáwan ngo majneaj leaw nejiw andiümüw marangüw; altiül nejíwan quiaj itsojow micuerpojüw nejiw. ²⁵Nejiw arangüw aag ayaj cos tangowüjchiw meáwan aaga naleaing leaw apiüng

Teat Dios; tandüjpiw leaw ngo maleaing. Nejiw ingow üjchiw omeajtsüw Teat Dios nerang meáwan leaw almajlüy, tujchiw omeajtsüw meáwan cuajantanej leaw Teat Dios tarang. Néjan quiaj Teat Dios netam masoic najneajay arang, aton müjchiiüts gracias meáwan nüt. Amén, aag ayaj naleaing.

²⁶Por aag ayaj Teat Dios tacueat nejiw marangüw xeyay monxing majaw nipilan. Montaj y monüx lango mind anojow, cos andiümüw majiürüw najtaj. ²⁷At monxey y monench lango mind aquiüjpüw najtaj, cos andiümüw majiürüw naxey. Aag ayaj xeyay monxing wüx nop naxey majiür naxey. Cos arangüw atquiaj, áag taxom nejiw cuajantanej monandeow. Aaga ngo majneaj teamamongochiw quiaj, aag ayaj netam nejiw cos xeyay ngo majneaj arangüw quiaj.

²⁸Nejiw cos ngo mandiümüw mayambüw Teat Dios mapiüngüw netam nejiw, quiaj Teat Dios tüüch nejiw marangüw aaga ngo majneaj amb wüx omeajtsüw quiaj, marangüw leaw ngo metam marangüch. ²⁹Nejiw xeyay arangüw cuajantanej ngo majneaj, monxey ajiürüw pálwüx najtaj, montaj ajiürüw pálwüx naxey. At monxey ajiürüw naxey, montaj ajiürüw najtaj. Altiül nerrejchiw, napatüw, ngo mind majawüw majiür cuajantanej alinop, ambiyaw nipilan. Ayambyambüw moncüy, newajichaw; andeaciüw ngo majneaj wüx ombas alinop. ³⁰Nejeyéjan quiaj andeacndeacayej wüx ombasüw, apaijchaw; ajcüyiw

majawüw Teat Dios, ngo majiürüw lasta alinop, nelomboochayej, nerangrangayej. Ayambüw nguineay marangüw alngün ngo majneaj leaw ngo majlüy tanomb; at ngo mayariw andeac miteatiw, mimümüw nejiw, ³¹nechachiw, ngo majawüw cuane najneaj, ngo marangüw leaw apiüngüw apmarangüw. Ngo mandiümüw nejinguind, ngo mawüniw wüx omeajtsüw leaw arang alinop, ngo majiürüw lasta nejinguind. ³²Nejiw ajawüw naleaing Teat Dios lamapiüng netam mandeow meáwan leaw nerang atquiaj; ngome áagan arangüw aaga ngo majneaj quiaj, aton apac omeajtsüw wüx alinop apmarang atnej arangüw nejiw.

Teat Dios ajaw wüx asoeteran

2 Nganüy sanasaj ic, ngo mejiür cuane apmewüyay wüx, ¿pues jane ic meyac asoet alinop? Cos wüx iyac asoet alinop iquiáyan quiaj iyaciüy isoet, cos atanej temerang aton. ²Icootsa ajawaats naleaing Teat Dios ajaw monrang ngo majneaj; apmüüch mamongochiw ngo majneaj atow nej arangüw. ³Nganüy ique neryac asoet alinop, ique atanej temerang. ¿Nguineay ipiünga, Teat Dios langome apmüüch ic memongoch ngo majneaja, ipiüng apmeriow wüxe? ⁴¿Ngwüy, ique ipiüng ngo metam ic mimonajneaj neje, iyaag Teat Dios apmafüc wüx leaw irang, ngome apmajcüye? Neol ngo mejaw sitiül nej teamafüc wüx meáwan, aag ayaj cos andiüm majaw meyaag xeyay ngo majneaj temerang,

mecueat. ⁵Nganüy cos nadam imeaats, ngo meyaag ngo majneaj teamerang. Atquiaj ique tenguiual meaach majcüy Teat Dios, ndoj alinoic nüt nej apmajüiquich cuane ngo majneaj netam memongoch wüx nüt apchetem majaw wüx asoeteran. ⁶Quiaj apmüüch anopnop atow nej tarang. ⁷Wüx aaga nüt quiaj, Teat Dios apmüüch mapac meáwan nüt tiül cielo leaw tanaám arang najneaj, majlüy najneajay mapac meáwan nüt. ⁸Nganüy leaw nelombojchay, leaw ngo mandiüm mayariw andeac Teat Dios, leaw monrang ngo majneaj; ajcüw ayaj Teat Dios ajcüw majaw. ⁹Meáwan nipilan monrang ngo majneaj apmamongochiw xeyay necoy, apmamix omeajtsüw. Meáwan aag ayaj nipilan judío ombas apmüjndiw mamongochiw, andüüban a nipilan ngome judío. ¹⁰Nganüy meáwan monrang najneaj, Teat Dios apmüüch majlüyiw najneaj, apmasoiqüiw najneaj arangüw, apmüüch nejiw majneaj omeajtsüw. Meáwan aag ayaj Teat Dios ombas apmüüch ajcüwa nipilan judío, ndoj andüüban apmüüch a nipilan ngome judío aton.

¹¹Atquiaj arang Teat Dios atotow, cos ngo mapiüng wüx jane nembeat jane ngo membeat. ¹²Meáwan leaw nerang ngo majneaj wüx nganaw majlüy aaga poch tüünd Moisés; pues wüx Teat Dios apmayac nej asoet, ngome apmasaj nej wüx aaga poch tüünd Moisés. Pero leaw nerang ngo majneaj masey lamanguiaj aaga poch tüünd Moisés, Teat Dios apmayac nej

asoet atnej apiüng aaga poch tüünd Moisés. ¹³Cos Teat Dios ngo mawün asoet jane nenguiáyan cuane apiüng tiül aaga poch tüünd Moisés. Nej awün asoet leaw nerang palan aaga poch. ¹⁴Jane ngome nipilan judío ngo majiür aaga poch tüünd Moisés. Naleaing wüx arangüw nejeyéjan quiaj atnej apiüng tiül aaga poch, aag ayaj nembeat poch ocueajiw nejiw, masey ngo majiürüw aaga poch tüünd Moisés. ¹⁵Cos wüx arangüw najneaj atnej apiüng, quiaj ajüic meáwan aaga poch quiaj ajlüy wüx omeajtsüw. Ayajcüw tiül omeajtsüw nejiw aaga nembeat poch quiaj, cos nguiaj leaaw omeajtsüw sitiül najneaj arangüw tengwüy ayajcüw ngo majneaj arangüw. ¹⁶Atquiaj apmajlüy aaga nüt quiaj wüx Teat Dios apmüüch Teat Jesucristo majaw wüx asoetiw nejiw leawa tarangüw axotayéjan. Cos Teat Cristo apmajaw wüx asoeteran atnej tüüch xic nasaj icon.

Nipilan judío y aaga ley ocueaj Moisés

¹⁷Nganüy sanasaj ic jangantanej naw tiül nipilan judío, ique ipiüng judío ic. At ipiüng irang atnej apiüng tiül aaga poch tüünd Moisés. Irangrangüy wüx cos ipiüng ijaw jane nej Teat Dios. ¹⁸Ijaw cuane andiüm Teat Dios merang, at ijaw cuane najneaj, cos tequiaacharan wüx a poch tüünd Moisés. ¹⁹Ipiüng alndom metiib mitiüd nop somb; ipiüng alndom meaach majlüy tiül ran nop leaw ajlüy tiül pojniün. ²⁰Ipiüng alndom mequiaach jane ngo majaw nicuajind; at alndom

mequiaach monguich, cos ijaw cuane apiüng tiül aaga poch tüünd Moisés. Ipiüng aag ayaj tüüch ic merndüy mexom imeaats wüx cuane naleaing. ²¹ Sitiül ique iquiaach alinop, ¿neol ngo merquijachay iquiáyan quiaja? Ique iquiaach nipilan ngo maneed, nganüy a ique tengual erneed. ²² Ique ipiüng ngondom nop naxey majiür minajtaj nej, at nop najtaj ngondom majiür minaxey nej. ¿Jow a ique neol teranga? At ipiüng ngo mind mejaw narangüch dios. ¿Jow a ique neol teneed aaga nembeat najlüy tiül nangaj iüm ocueaj ajcüwa dioses quiaja? ²³ Irangrangüy, cos ipiüng ijiür aaga poch tüünd Moisés. ¿Neol ngo mejaw, tengual meaach majcüy Teat Dios wüx irang leaw apiüng Moisés ngondom marangüch? ²⁴ Naleaing tarangüch tiül Mipoch Teat Dios, apiüng: “Nipilan leaw ngome judío andeaciw ngo majneaj wüx ombas Teat Dios cos icona ngo majneaj irangan”, aw.

²⁵ Naleaing aaga circuncisión irangan, aag ayaj nembeat sitiül iyac wüx imeaats leaw apiüng tiül aaga poch tüünd Moisés. Pero sitiül ngo merang atnej, aaga circuncisión quiaj ngo membeat nicuajind, atanej ngo mejiür masey ijiür. ²⁶ Sitiül pálwüx nipilan ngome judío leaw ngo majlüy circuncidado ayac wüx omeaats atnej apiüng tiül aaga poch tüünd Moisés, Teat Dios apmajaw nej atanej majlüy circuncidado, masey ngo majlüy. ²⁷ Masey aljane ngo majlüy circuncidado, sitiül nej arang atnej apiüng tiül aaga poch tüünd Moisés,

nej alndom mayac isoet, cos ique irang ngo majneaj, masey ijiür meáwan aaga poch tüünd Moisés narangüch wüx nawüig, masey ijlüy circuncidado aton. ²⁸ Cos nop ngo majlüy merrey judío nej masey naw tiül nipilan judío, cos aaga circuncisión arangüch wüx cuerpo ngome nembeat sitiül nej ngo mayac wüx omeaats Mipoch Teat Dios. ²⁹ Pues nop merrey judío, aag ayaj nop neyac wüx omeaats marang leaw apiüng tiül Mipoch Teat Dios. Aton aaga circuncisión quiaj apiüng wüx leawa Nangaj Espíritu arang sitiül nop apmayac wüx omeaats marang najneaj atnej andiüm Teat Dios. Aag ayaj Teat Dios apiüng najneaj arang, masey nipilan ngo mapiüngüw najneaj arang.

3 ¿Cuane axomüw wüx nipilan sitiül judío nejiw; aton cuane axomüw wüx sitiül ajlüyiw circuncidado? ² Pues xeyay axomüw wüx, cos Teat Dios ombas tüüch nejiw majiürüw Mipoch nej. ³ Naleaing ngome meáwan nipilan tiül Israel tarangüw atnej apiüng Teat Dios. Nganüy cuane ipiüangan, ¿ndot ngo marangüw meáwan aag ayaj, Teat Dios langome apmarang leaw lamapiüng apmaranga? ⁴ Ngwüy, Teat Dios apmarang leaw lamapiüng, cos nej ngo mawaiich, masey meáwan nipilan awaijchaw. Aag ayaj apiüng tiül Mipoch nej, cos apiüng:

Apmajaraw naleaing meáwan leaw indeac.

Wüx apmajaraw wüx isoet, apmapiüngüw ique ngo mejiür nicuajind nisoet, aw.

⁵Sitiül wüx arangaats ngo majneaj, quiaj ajüiquichaats Teat Dios arang más najneaj, ¿cuane apmapiüngaats wüx aag ayaja? ¿Apmapiüngaatsa Teat Dios ngo majneaj arang sitiül apmüüch icoots mamongochiüts ngo majneaja por aaga ngo majneaj arangaats? (Sandeac atquiaj cos nipilan atquiaj apiüngüw.) ⁶iNgwüy, Teat Dios nómban ngondom marang ngo majneaj! Cos sitiül Teat Dios ngo majneaj arang, ¿ngüneay apmajaw wüx asoet nipilan?

⁷Nganüy sitiül xique sawaiich, quiaj sajüiquich Teat Dios nómban ngo mawaiich; ¿neol apmanderac wüx ximbas at xic nop nejiür nisoete? ⁸Sitiül atquiaj ajlüy, ¿neol ngo marangaats ngo majneaj para majlüy más najneaja? Cos atquiaj andeacüw acas nipilan apiüngüw xiconat atquiaj saquiajchiün. Aag ayaj apiüngüwan cos andeacüw ngo majneaj wüx ximbasan. Ajcüwa nipilan quiaj apmamongochiw xeyay ngo majneaj cos áag netam nejiw.

Meáwan icootsa ajiüraats nisoet

⁹Nganüy cuane ipiüangan, ¿jowa icootsa nipilan judío, más najneaj majaw icoots Teat Diosa, ngo mat icoots meáwan pálwüx nipilana? Aag ayaj ngo maleaing, cos lanapiüing meáwan nipilan arangüw ngo majneaj, masey judíos, masey nipilan ngome judío. ¹⁰Atcüy apiüng tiül Mipoch Teat Dios:

Ngo majlüy nejingund nerang palan najneaj, ngome nop;

¹¹nejinguind ngo mandium majaw leaw andium Teat Dios,

nejinguind ngo mayamb nej.

¹²Meáwan nipilan lambiüjlajow wüx arangüw ngo majneaj; nómban lamandüjpiw aaga ngo majneaj tiüid.

Ngo majlüy nejingund marang najneaj, ngome nop.

¹³Xeyay ngo majneaj poch aw teombeayiw nejiw, atnej najmboc naw tiül niüng amiüraad mondeow.

Oniweaw nejiw ayac nejiw wüx mewaijchaw.

Apal ombeayiw nejiw ajlüy atnej micüy napat ndiüc;

¹⁴apaijchaw, ngo mandeacüw najneaj poch.

¹⁵Najénan acuiürrüw mambiyaw alinop.

¹⁶Nguiajantanej mambüw androjchiw ombas cuajantanej, üjchiw mamix omeaatsaran.

¹⁷Nómban ngondom mayajcüw monajneaj.

¹⁸Ngo mapiüngüw wüx mimboloj mandüyiw Teat Dios.

¹⁹Icootsa ajawaats meáwan leaw apiüng tiül aaga poch tüünd Moisés, aag ayaj nembeat ocueajiw ajcüwa nipilan leaw ajiürüw aaga poch quiaj. Aaga poch quiaj ajüiquich nguineay meáwan nipilan arangüw ngo majneaj. Aaga poch apal ombeayaran, quiaj nejingund ngondom mapiüng Teat Dios ngondom mayac nej asoet. ²⁰At nejingund ngondom mapiüng apmaw asoet nej, cos arang atnej apiüng tiül aaga poch tüünd Moisés. Cos aaga mipoch Moisés quiaj, üüch icoots majawaats cuane nisoet ajiüraats.

**Néjan Teat Dios alndom
mawün icoots wüx**

²¹Nganüy Teat Dios lamüüch icoots majawaats nguineay alndom mawün asoetiüts. Aaga poch tüünd Moisés ngo mambeol nicuajind, masey naleaing tandec wüx. At mondeac andeac Teat Dios tapiüngüw wüx aag ayaj. ²²Nganüy ajawaats Teat Dios awün asoet meáwan nipilan monyar andeac Teat Jesucristo. Atquiaj arang Teat Dios wüx meáwan nipilan leaw apmüüch nej omeaats nej, masey judíos, masey jangantanej nipilan. ²³Cos meáwan nipilan arangüw nisoet, nejingüind ngondom matüch mimonajneaj Teat Dios maw asoet nej. ²⁴Pero Teat Dios alndom mawün asoetiüts, ngo metam mangüyiiüts nicuajind, cos Teat Cristo tandeow mawün icoots wüx asoetiüts. ²⁵Teat Dios tayac Teat Cristo mandeow ingow andeowaats maw asoetiüts sitiül apmüjchiiüts omeajtsaats. Atquiaj tarang Teat Dios majüiquich naleaing nej najneaj arang; tafüc wüx meáwan nisoet tajiüraats. ²⁶Nganüy nej ajüiquich tanaámb najneaj arang cos awün asoet meáwan nipilan leaw üüch omeaats Teat Jesús.

²⁷Pares ngondom merangrangayoots, cos ngome ajcan lamarangaats atnej apiüng tiül a poch tüünd Moisés apmaw asoetiüts; asoetiüts aw wüx ayariiüts mipoch Teat Cristo. ²⁸Quiaj ajawaats Teat Dios lamawün asoetiüts cos ayariiüts mipoch Teat Cristo, ngome aag arangaats atnej apiüng tiül a poch tüünd Moisés.

²⁹¿Jow Teat Dios, áagan Midiosan nipilan judío neje? ¿Ngwüye, ngome Midiosüw pálwüx nipilan atona? Pues naleaing, nej Midios pálwüx nipilan aton. ³⁰Cos Teat Dios nop nej, alndom mawün asoet meáwan nipilan leaw ayar nej andeac, masey ajliüy circuncidado, masey ngo majliüy. ³¹¿Jow nganüy, cuane apmapiüngaatsa? ¿Alndom mapiüngaatsa aaga poch tüünd Moisés lango metama, cos lamayariiüts andeac Teat Cristo? ¡Ngwüy ngondom mapiüngaats atquiaj! Cos wüx ayariiüts andeac Teat Cristo, arangaats atnej apiüng tiül aaga poch tüünd Moisés. Quiaj ajüic aaga poch leaw Moisés tüünd naleaing aliün metam.

Nguineay Abraham taw wüx asoet

4 ¿Jow nganüy nguineay apmapiüngaats wüx mixejchiiüts Abrahama, nguineay taw asoet neje? ²Cos sitiül Abraham taw asoet nej ajcan arang najneaj, nej alndom merangrangüy wüx, pero naleaing ngome arangrangüy majaw nej Teat Dios. ³¿Neol cuane apiüng tiül Mipoch Teat Dios wüx aag ayaja? Apiüng: “Abraham tayar andeac Teat Dios, pares taw asoet nej”, aw. ⁴Cos sitiül aljane marang najiüt apmangüyeran minajiüt nej, naleaing aag ayaj ngome üündan, aag ayaj ombeat arang najiüt. ⁵Pero wüx aljane apmüüch omeaats Teat Dios, mapiüng Teat Dios alndom mawün wüx nisoet jangantanej leaw apmayar nej andeac; quiaj Teat Dios apmawün nej asoet cos ayar nej andeac, masey nej ngome aleaic marang para alndom maw

wüx. ⁶Aaga Rey David tandeac wüx aag ayaj aton, cos tapiüng najneajay ajlüy leaw Teat Dios apmawün asoeti wüx masey ngondom marangüw nicuajind. ⁷Rey David tapiüng:

Najneajay apac omeaats leaw Teat Dios lamawün nej asoet, nómban lango majüic asoet nej.

⁸Najneajay apac omeaats leaw Teat Dios lamasaj nej lango majiür nicuajind nisoet, aw.

⁹¿Jow nganüy cuane apmapiüngaats wüx aag ayaja? ¿Apmapiüngaatsa aaga najneajay quiaj, tasoiquiw áagan nipilan judío monlüy circuncidado? ¿Ngwüy aag ayaj aton tasoiquiw ajcüwa nipilan ngome judío leaw ngo majlüyi wüx circuncidado? Lanapiüng Teat Abraham tawün nej asoet nej Teat Dios cos tayar nej andeac. ¹⁰¿Ngüt tajwan asoet nej? ¿Tajwan asoet nej wüx landoj ajlüy circuncidado, ngwüy wüx nganawa? Pues nej tajwan asoet nej wüx nganaw majlüy circuncidado. ¹¹Abraham tayar andeac Teat Dios, ndoj quiaj tajlüy circuncidado. Aag ayaj tajlüy para majüiquich naleaing lamayar andeac Teat Dios. Cos Teat Dios lamawün nej asoet wüx nganaw majlüy circuncidado, quiaj a Abraham tiün marang atnej nateataran ocueajiw meáwan monyar andeac Teat Dios, ajcüw leawa Teat Dios lamawün asoeti wüx masey ngo majlüyi wüx circuncidado. ¹²Aton Abraham arang atnej nateataran ocueajiw meáwan nipilan monlüy circuncidado, para nejwü aton alndom mayariw andeac

Teat Dios atnej nej tayar wüx nganaw majlüy circuncidado.

**Teat Dios apmarang
leawa lamapiüng sitiül
mayariüts andeac nej**

¹³Cos Teat Dios ngome tasaj a Abraham apmüjndiw mayariw micual nej meáwan iüt leaw almajlüy, ajcan andüjpiw aaga poch tüünd Moisés. iNgwüy! Aag ayaj cos ayacüw omeajtsüw wüx Mipoch Teat Dios marangüw leaw apiüng. ¹⁴Cos sitiül ajcüwan a nipilan monrang leaw apiüng tiül a poch tüünd Moisés apmüjndiw leaw lamapiüng Teat Dios, quiaj lango metam mayariüts andeac Teat Cristo. At leaw Teat Dios lamasaj Abraham apmüüch, lango membeat aton. ¹⁵Meáwan nipilan leaw ngo marang atnej apiüng tiül mipoch Moisés üüch majcüy Teat Dios. Nganüy sitiül ngo majlüy aaga mipoch Moisés quiaj, nejingund ngondom majiür asoet wüx aag ayaj.

¹⁶Leawa Teat Dios lamapiüng apmüüch quiaj, aag ayaj apmüüch jane neyar nej andeac, apmüüch üüchan. Teat Dios apmüüch meáwan micual Abraham. Aag ayaj ngome ajcüwan judíos mondüüb mipoch Moisés, aton apmüjndiw meáwan nipilan ngome judío leaw lamayariw andeac Teat Dios atnej Abraham tayar, cos nej miteatiüts. ¹⁷Aag ayaj apiüng wüx aton tiül Mipoch Teat Dios, cos apiüng: “Lanayac ic merang miteatiw xeyay palpálwüx nipilan”, aw. Aaga leaw apiüng quiaj, nembeat majaw Teat Dios, aaga Dios leaw alndom mapacüüch alinomb mondeow.

Aton nej alndom müüch majliü cuajantanej masey nganaw majliü. Aaga Teat Dios quiaj, Abraham tayar nej andeac.

¹⁸Abraham tayar leaw lamapiüing Teat Dios wüx tapiüing apmajiürüw xeyay micualüw nejiw, masey langondom majiürüw. Nej tayar wüx tasoic: “Apmejiüran xeyay micualan”, ajow. ¹⁹Abraham ngome tachiw omeaats wüx Teat Dios masey langondom majiürüw micualüw nejiw, cos tayaag nej latang laliüc mandeow, cos laliüc majiür coic miow (100) mineat nej. Aton Sara mintaj nej ngondom majiür micual nej. ²⁰Abraham ngo machiw omeaats mapiüing ngo maleaing leaw lamapiüing Teat Dios. Nej tüüch gracias Teat Dios, tapac omeaats. ²¹Nómban tapiüing naleaing Teat Dios alndom marang meáwan leaw lamapiüing apmarang. ²²Cos Abraham tapiüing naleaing apmajliü meáwan leaw lamasoic, áag Teat Dios tawün nej asoet.

²³Ngome néjan quiaj apiüing tiül Mipoch Teat Dios taw asoet nej, ²⁴Aton aag ayaj apiüing wüx icootsa leaw lamayariiüts andeac Teat Dios, áag tapacüüch alinomb Miteatiiüts Jesús. ²⁵Cos Teat Jesús tayacüch teowixaw nipilan mandeow ingow andeowaats, condom tapacüüch nej Teat Dios alinomb para majliüyiiüts atnej nómban ngome aag arangaats nisoet.

**Nganüy ajaw icoots Teat Dios
atnej ngo majiüraats nisoet**

5 Nganüy lango majiüraats nisoet majaw icoots Teat Dios; lamawün asoetiiüts cos ayariiüts

andeac nej, aton cos ayacaats omeajtsaats wüx Teat Cristo. Najneajay ajliüyiiüts lango majcüy majaw icoots, cos aquiüjpaats Teat Dios. ²At icootsa ajawaats lamaxomaats xeyay monajneaj wüx nej cos tanaám ayariiüts andeac nej, ngo macueatiiüts. Xeyay apac omeajtsaats cos ajawaats apmajliüyiiüts najneaj maquiüjpaats Teat Dios. ³Ngome áagan ayaj, apac omeajtsaats aton masey amongochiiüts naél. Cos wüx amongochiiüts naél, ambeol icoots xeyay maiücaats wüx cuajantanej. ⁴Sitiül icootsa maiücaats wüx alndom mawaats tiül naél; wüx laawaats tiül aaga naél quiaj, quiaj alndom macüliiüts leaw aliüc miün. ⁵Aaga leaw teamacüliiüts aliüc miün quiaj, aag ayaj naleaing apmajliü atnej lamapiüing Teat Dios. Cos nej xeyay lamajiür icoots lasta, lamüüch icoots majiüraats Nangaj Miespíritu nej tiül omeajtsaats.

⁶Wüx icootsa nómban ngo majiüraats apacaats, quiaj tatüch a nüt mapiüing Teat Dios, miün Teat Cristo mandeow mawün wüx monrang nisoet. ⁷Naleaing naél maxoram aljane mandium mandeow ingow andeow alinop masey nerang najneaj. ¿Ngwüy naleaingue aljane alndom mapiüing mandeowa ingow andeow nop nerang najneaja? ⁸Nganüy Teat Dios tajüiquich guineay nej ajüür icoots lasta, cos tüüch miün mandeow Teat Cristo ingow andeowaats wüx aliün marangaats ngo majneaj. ⁹Pares nganüy cos Teat Cristo tandeow taw miquiej nej para mawün asoetiiüts, Teat Dios lango

majcüy majaw icoots. ¹⁰Cos icootsa nomb tadjcüy majaw icoots Teat Dios; nganüy najneaj majaw icoots, cos Micual nej tandeow ingow andeowaats. Nganüy ajlüyüüts najneájan maquiüjpaats Teat Dios, apmawaats wüx asoetiüts cos Teat Cristo almapac. ¹¹Ngome áagan, xeyay apac omeajtsaats aton wüx Teat Dios, cos Miteatiüts Jesucristo tüüch icoots majlüyüüts nóiquian maquiüjpaats Teat Dios, lango majcüy majaw icoots.

Adán y Teat Cristo

¹²Cos nisoet tajlüy ningüy wüx iüt imiün wüx nop naxey nenüt Adán, aaga nisoet quiaj üüch mandeowaran. Naw quiaj meáwan nipilan wüx iüt andeowüw, cos meáwan nipilan ajiürüw nisoet. ¹³Tanomb wüx nganaw majlüy aaga poch tüünd Moisés, meáwan nipilan tarangüw ngo majneaj. Naleaing wüx ngo majlüy mipoch Moisés, nejinguind ngo majmel asoet nej wüx aag ayaj. ¹⁴Pero naleaing meáwan nipilan tandeowüw ajan wüx Adán aleaw wüx Moisés, masey ngo majiürüw nisoet atnej leaw tajiür Adán. Aaga Adán quiaj ajlüy landiüm matnej leaw tapiürang aliüc.

¹⁵Leawa Teat Dios üüch icoots, üüchan, aag ayaj xeyay najneaj, ngo matnej leaw Adán tüüch icoots. Cos sitiül meáwan nipilan andeowüw ajcan tarang nisoet nop naxey, aag ayaj Adán, cuantemas nganüy Teat Dios alndom mawün wüx meáwan nipilan, cos nop naxey, aag ayaj Teat Jesucristo xeyay tajiür icoots lasta. ¹⁶Aaga leaw Teat Dios üüchan

icoots, aag ayaj ngo matnej leaw tayac icoots wüx nop naxey wüx tarang nisoet. Cos tajmel asoetiüts ajan wüx aaga nisoet tarang Adán. Nganüy aaga leaw üüch icoots Teat Dios, üüchan, tüüch icoots masey xeyay nisoet arangaats, cos atquiaj alndom maw asoetiüts. ¹⁷Sitiül meáwan nipilan netam mandeow ajan wüx aaga nisoet tarang nop naxey, cuantemas nganüy xeyay nipilan apmapaciw por nop naxey. Ajcüw ayaj leaw lamüjndiw majiürüw monajneaj, üjndiwan. Lamawün nej asoetiw Teat Dios cos ayariw andeac nop Teat Naxey aag ayaj Teat Jesucristo. ¹⁸Atnej nganüy ajlüy noic xeyay ngo majneaj apmamongochiw nipilan, ajcan nop naxey ngo marang leaw apiüng Teat Dios. Atquiaj aton alndom maw asoeteran mapacaran meáwan nüt, cos Teat Cristo xeyay najneaj tarang wüx tandeow wüx cruz. ¹⁹Cos atquiaj atnej wüx nop naxey ngo marang atnej apiüng Teat Dios, meáwan nipilan lajlüyiw monrang nisoet. Atquiaj nganüy cos nop naxey tarang atnej apiüng Teat Dios, xeyay nipilan apmajlüyiw najneaj majaw nejiw Teat Dios, cos laáw asoetiw nejiw.

²⁰Teat Dios tüüch Moisés aaga poch majüiquich ajlüy xeyay nisoet. Naleaing masey nipilan tarangüw xeyay ngo majneaj, Teat Dios tajiür nejiw lasta xeyay. ²¹Ajawaats meáwan nipilan netam mandeow cos ajiürüw nisoet, pero Teat Dios tüüch icoots mimonajneaj nej, tajiür icoots lasta. Nganüy alndom majlüyüüts najneaj teombas Teat Dios, mapacaats meáwan nüt tiül

cielo, cos Miteatiiüts Jesucristo tandeow mawün asoetiiüts.

Por Teat Cristo icoots almapacaats, langome aliünaats tiül nisoet

6 ¿Cuane apmapiüngaats nganüye? ¿Netam tanaámb marangaats nisoete para alndom majiür icoots lasta Teat Dios? ²iNgwüy ngo matquiaj! Cos ajlüyiiiüts atnej landeowaats. ¿Nguineay alndom mandüyiiiüts wüx marangaats nisoete? ³¿Neol ngo mejawana, meáwan leawa lamayariiüts yow, majüiquichaats ajlüyiiiüts nóiquian maquiüjpaats Teat Cristo, aton tajlüyiiiüts nóiquian maquiüjpaats wüx tandeowa? ⁴Cos wüx ayariiüts yow ajlüyiiiüts atnej tamiürajaats maquiüjpaats Teat Cristo. Ndoj Teat Dios tapacüüch Teat Cristo, cos nej alndom marang cuajantanej najneaj. Atquiaj icoots aton ajlüyiiiüts atnej tapacaats alinomb marangaats leaw najneaj, ngo matnej tarangaats nomb.

⁵Sitiül tajlüyiiiüts nóiquian maquiüjpaats wüx tandeow, naleaing aton apmajlüyiiiüts nóiquian maquiüjpaats wüx apmapacaats tiül mondeow atnej tapac. ⁶Ajawaats meáwan ngo majneaj tarangaats nomb, aag ayaj atnej tamb wüx cruz nóiquian maquiüüb nej ndrom ombas nómban. Aaga nganüy ngo metam mandüyiiiüts wüx marangaats leaw ngo majneaj. ⁷Cos sitiül aljane landeow nóiquian maquiüüb Teat Cristo aag ayaj laáw asoet nej. ⁸Cos sitiül tandeowaats maquiüjpaats Teat Cristo, ajawaats aton alinoic

nüt apmapacaats maquiüjpaats tiül cielo. ⁹Ajawaats Teat Cristo tapac imiün tiül mondeow, nej langondom mandeow alinomb, nómban ngondom mandeow.

¹⁰Cos Teat Cristo wüx tandeow tandrooch ombas meáwan nisoet, ndoj wüx tapac alinomb, tapac majlüy nóiquian maquiüüb Teat Dios. ¹¹Nganüy icona aton netam meyajcan ijlüyiiün atnej nop nandeow, cos nop nandeow langondom marang ngo majneaj. Pero naleaing netam meyajcan lamüüch icon mepacan Teat Dios, cos ijlüyiiün nóiquian mequiüjpan Teat Cristo.

¹²Nde merangan ngo majneaj leaw andiüm micuerpojan mayac icon wüx, cos nisoet lango marang minatangan, lango metam merangan leaw andiüm. ¹³At nde meyacan wüx micuerpojan marang ngo majneaj; ingow aag ayaj ijchan imeajtsan Teat Dios. Nej apmüüch merangan najneaj, cos nganüy ijlüyiiün atnej lamapacüüch icon alinomb. At netam meajchiün micuerpojan merangan najneaj atnej Teat Dios andiüm. ¹⁴Nganüy nisoet langondom müüch icon merangan leaw ngo majneaj, cos langome temeyamban mawün icon wüx aaga poch tüünd Moisés. Icona nganüy ijlüyiiün tiül mimonajneaj Teat Dios.

Nop najon marang najiüt ngondom marang andiüman nej

¹⁵¿Jow nganüy cuane apmarangaatsa? ¿Ngome apmacueatiiüts arangaats nisoete, cos nganüy lango metam

marangaats atnej apiüng tiül aaga poch tüünd Moisés ajcan ajlüyüüts tiül mimonajneaj Teat Diosa? iNgwüy ngondom! ¹⁶Cos icona ijawan sitiül irangan minajiüt alinop ngondom merangan leaw indiüman; netam merangan leaw apiüng neneay najiüt. Atquiaj aton sitiül apmerangan leaw andiüm micuerpojan ndójjwüx apmendeowan. Tengwüy sitiül apmerangan leaw andiüm Teat Dios, nej apmawün isoetiün. ¹⁷Süüch gracias Teat Dios, cos nganüy ijchan imeajtsan meyariün aaga leawa tequiaacharanan wüx, masey nomb terangan xeyay nisoet. ¹⁸Temerangan najneaj atnej andiüm Teat Dios; leriowan tiül irangan ngo majneaj leaw terangan nomb. ¹⁹(Aag ayaj sasaj icon leaw nipilan arang, cos nganaw mejawan nguineay amb leaw teanasaj icon quiaj.) Atquiaj atnej nomb teajchiün micuerpojan majlüy tiül nisoet marang ngo majneaj; atquiaj a nganüy ijchan marang najneaj micuerpojan, marang leaw andiüm Teat Dios.

²⁰Cos nomb wüx ngondom mecueatiün merangan nisoet, ngondom merangan nicuajind najneaj atnej andiüm Teat Dios. ²¹¿Naleaing cuane texoman wüx aaga ngo majneaj terangan nomb leaw üüch icon monxing nganüy? Nicuajind ngo mexoman wüx, cos andüy wüx apmayac icon tiül ngo majneaj meáwan nüt. ²²Nganüy Teat Dios lamawün icon tiül nisoet, lamüüch icon mejlüyiün ocueaj nej. Aag ayaj apmexoman xeyay najneaj nganüy, ndójjwüx apmepacan

meáwan nüt niüng ajlüy Teat Dios. ²³Cos sitiül aljane tanaámb arang nisoet, wüx apmandeow, quiaj apmangüy xeyay ngo majneaj; pero jane apmayar aaga najneajay leaw Teat Dios üüchan, aag ayaj apmapac meáwan nüt tiül cielo maquiiüb Miteatiiüts Cristo Jesús.

Andeac wüx mongoch owix

7 Xecojow xechijquiaw, sasaj icon leaw ijawan wüx a poch tüünd Moisés. ¿Neol ngo mejawana? Cos wüxan aljane aliün mapac netam marang atnej apiüng tiül mipoch Moisés. ²Moisés tapiüng nop najtaj netam mayar andeac minoj nej wüx aliün mapac. Pero sitiül minoj nej landeow, quiaj nej lajlüyan, lango membeat aaga poch. ³Nganüy sitiül almapac minoj nej, ndoj nej maquiiüb alinop naxey, aag ayaj atnej nop nejiür minaxey nej. Pero sitiül minoj nej landeow, quiaj nej lajlüyan lango membeat aaga poch quiaj, masey majiür alinop minoj nej, aag ayaj ngome nisoet .

⁴Atquiaj icona ijlüyiün nganüy, xecojow xechijquiaw, cos wüx Teat Cristo tandeow, icona atnej tendeowan mequiiüjpan aton. Nganüy lango metam mendüjpiün aaga poch leaw tarang Moisés; ijlüyiünan para mendüjpiün alinop, aag ayaj Teat Cristo, cos nej tapac alinomb. Atquiaj ijlüyiün para merangan najneaj atnej andiüm Teat Dios. ⁵Wüx icootsa aliün marangaats leaw andiümdümaats, tandiümaats marangaats ngo majneaj, cos wüx tanguiaiüüts nguineay apiüng tiül a poch

tüünd Moisés, quiaj tajüic xeyay ngo majneaj arangaats, aag ayaj andüy wüx apmayac icoots tiül ngo majneaj. ⁶Nganüy lango metam mandüjpüüts aaga poch tüünd Moisés, cos wüx tandeowaats maquiüjpaats Teat Cristo, quiaj lango metam icoots aaga poch quiaj. Nganüy ajlüyüütsan marangaats leaw andiüm Teat Dios. Cos Nangaj Miespíritu nej lamüüch icoots marangaats najneaj, ngo matnej arangaats nomb, wüx arangaats atnej apiüng tiül aaga poch tüünd Moisés.

Nisoet ngo mandiüm macueat xic

⁷¿Jow nganüy nguineay apmapiüngaats wüx aag ayaja? ¿Apmapiüngaats aaga poch tüünd Moisés quiaj, aag ayaj nisoete? iNgwüy, ngome áag! Cos sitiül ngo majlüy aaga poch tüünd Moisés, xique ngome tajawas cuane nisoet. Sitiül aaga poch tüünd Moisés ngo mapiüng: “Nde mendiümdüüm ocueaj alinop”, ¿nguineay sanajaw sarang nisoet wüx sandiümdüüm ocueaj alinopa? ⁸Naleaing aaga poch tüünd Moisés tüüch xic najaw wüx apmandiümdüümaran cuajantanej, aag ayaj nisoet, quiaj xique tandiümdüümas cuajantanej. Pero sitiül ngo majlüy a poch tüünd Moisés ngo majaraw cuane nisoet. ⁹Nomb xique sapiüng salnapac sarang najneaj, cos ngo nayaag ximeats cuane ajlüy tiül aaga poch tüünd Moisés. Naleaing wüx tateowas aaga poch tüünd Moisés, quiaj tajawas sarang nisoet, sajlüy atnej nop nandeow. ¹⁰Quiaj tajawas aaga poch tüünd Moisés leaw

tajlüy para mambeol mapacaran, tüüch xic nayaag atnej lasandeow.

¹¹Cos masey aaga poch tüünd Moisés tüüch xic najaw aaga nisoet teanarang quiaj, pero tawaiich xic, cos ngondom nacueat narang.

¹²Naleaing aaga poch tüünd Moisés quiaj, nangaj najneaj; y leaw apiüng netam marangüch, aag ayaj nangaj najneaj aton. ¹³¿Jow nganüy, aaga poch tüünd Moisés quiaj masey najneaj, pero tiün müüch xic nandeow tiül ngo majneaja? iNgwüy! Nisoet nerang aag ayaj, tüüch xic nandeow tiül ngo majneaj para majüic sarang nisoet, aag tayamb leaw najneaj mejüiquichay wüx. Cos wüx ajaraw cuane apiüng tiül mipoch Moisés, quiaj ajaraw a nisoet nguineay ngo majneaj ajlüy.

¹⁴Cos ajawaats aaga poch tüünd Moisés, aag ayaj Nangaj Espíritu ocueaj Teat Dios neyac. Nganüy xique cos nipilan xic, sarang leaw nisoet andiüm. ¹⁵Xique ngo najaw neol tarangas leawa sarang, cos ngo narang leawa sandiüm narang, sarang leawa ngo nandiüm narang.

¹⁶Pero sitiül sarang leawa ngo nandiüm narang, quiaj ajüic aaga poch tüünd Moisés quiaj najneaj.

¹⁷Atquiaj ngome xique sarang aaga ngo majneaj quiaj, nisoet leaw sajiür tiül ximeats nerang aag ayaj.

¹⁸Sajaw xíquian quiaj ngondom narang nicuajind najneaj, masey alwüx ximeats sandiüm narang najneaj, pero naleaing ngondom narang. ¹⁹Cos ngondom narang najneaj leaw sandiüm narang, sarang ngo majneaj leaw ngo nandiüm narang. ²⁰Sitiül sarang leaw ngo nandiüm, ngome xique

sarang aag ayaj, nisoet leaw ajlüy tiül ximeaats nerang aag ayaj.

²¹Atquiaj wüx sandiüm narang najneaj, quiaj sayaag aliün nandiüm narang ngo majneaj. ²²Tiül xique, tiül ximeaats sandiüm narang najneaj leaw Teat Dios andiüm.

²³Pero naleaing sayaag altiül xique alngün ngo majneaj leaw ngo müüch xic narang leaw najneaj sayaag tiül ximeaats. Aag ayaj nisoet leaw üüch xic najlüy atnej nop najlüy tiül manchiüc.

²⁴iPares xeyay ngo majneaj ximeaats! ¿Nganüy jane alndom mambeol xic nacueat narang aaga ngo majneaj leaw sandiüm? Cos andüy wüx apmambiy xic. ²⁵Süüch gracias Teat Dios, cos Miteatiüts Teat Cristo lamambeol xic. Nganüy sayar Mipoch Teat Dios tiül ximeaats, masey xecuerpo aliün mandiüm marang nisoet.

Nangaj Espíritu ocueaj Teat Dios ambeol icoots

8 Nganüy meáwan mondüüb Teat Cristo lango majmel nicuajind asoetiw. Cos nejiw lango mandiümüw marangüw atnej andiüm micuerpojüw nejiw; nejiw andiümüw marangüw leaw andiüm Nangaj Espíritu ocueaj Teat Dios. ²Cos Dios Nangaj Espíritu, aaga neech icoots mapacaats nóiquian maquiüjpaats Teat Cristo, lamawün icoots tiül nisoet; lango mandeowaats mambaats tiül castigo. ³Aaga poch tüünd Moisés ngondom mawün wüx ombasaats nisoet, cos nipilan icoots. Naleaing Teat Dios tawün asoetiiüts cos tüüch miün micual nej majlüy

nipilan atnej ajlüyiiiüts. Nej tandeow atnej nichech mangüy asoetiiüts.

Quiaj tawün meáwan nisoet najlüy wüx ombasaats. ⁴Atquiaj tarang Teat Dios para alndom marangaats palan atnej apiüng tiül aaga poch tüünd Moisés, cos lango marangaats atnej icoyóotsan quiaj andiümaats; nganüy arangaats atnej andiüm Nangaj Espíritu ocueaj Teat Dios.

⁵Cos jane arang atnej néjan quiaj andiüm marang, aag ayaj ayac wüx omeaats leaw andiüm micuerpo nej. Nganüy jane arang atnej andiüm Nangaj Espíritu ocueaj Teat Dios, ayac wüx omeaats leaw andiüm Nangaj Espíritu. ⁶Cos sitiül arangaats atnej icoyóotsan quiaj andiümaats, apmüüch icoots mandeowaats mambaats tiül castigo. Nganüy sitiül arangaats atnej andiüm Nangaj Espíritu ocueaj Teat Dios, apmapacaats meáwan nüt tiül cielo, najneajay apmajlüyiiiüts. ⁷Pero jane ayac omeaats wüx leawa néjan quiaj andiüm, Teat Dios ngo majneaj majaw, cos ngo mandiüm mandüüb leaw apiüng tiül Mipoch Teat Dios, at ngondom marang. ⁸Atquiaj jane neyac omeaats wüx marang leaw néjan quiaj andiüm, nómban ngondom majneaj majaw nej Teat Dios.

⁹Pero nganüy icona nde merangan leaw icoyónan quiaj indiüman. Sitiül naleaing ijiüran Nangaj Espíritu ocueaj Teat Dios tiül imeajtsan, irangan leaw andiüm Nangaj Espíritu. Nganüy sitiül aljane ngo majiür Nangaj Espíritu tiül omeaats nej, ngome

ocueaj nej Teat Cristo. ¹⁰Nganüy sitiül Teat Cristo ajlüy tiül imeajtsan quiaj imeajtsan almapac cos lamawün isoetiün; pero micuerpojan atnej landeow cos ajlüy tiül nisoet. ¹¹Sitiül ajlüy tiül imeajtsan Nangaj Espíritu ocueaj Teat Dios, áag tapacüüch Teat Jesús alinomb imiün tiül mondeow; pues nej aton apmapacüüch alinomb micuerpojan ijiüran nganüy. Cos Teat Dios apmarang aag ayaj naag Miespíritu nej najlüy tiül imeajtsan.

¹²Nganüy xecojow xechijquaw, ngo metam marangaats leaw icoyóotsan quiaj andiümaats. ¹³Cos sitiül apmerangan atnej indiüman icoyónan quiaj, apmendeowan. Nganüy sitiül apmeajchiün mambeol icon Nangaj Espíritu ocueaj Teat Dios mawün wüx imeajtsan leaw icónan quiaj indiüman merangan, quiaj apmepacan.

¹⁴Meáwan leaw arang atnej andiüm Nangaj Espíritu ocueaj Teat Dios, ajcüw ayaj micual nejiw Teat Dios. ¹⁵Cos aaga Nangaj Espíritu lameajndiün quiaj, ngo müüch icon mermbolan alinomb mejlüyiün at nejiw najonüw monrang najiüt. Aaga Espíritu lameajndiün quiaj, aag ayaj lamüüch icon mejlüyiün micual icon Teat Dios. Áag nganüy üüch icon mepiüangan: “iXeteatiün Teat Dios!”, merawan. ¹⁶Nejay Miespíritu Teat Dios quiaj, üüch icoots mayajcaats tiül omeajtsaats icootsa ajlüyüüts micual icoots Teat Dios. ¹⁷Sitiül ajlüyüüts micual icoots Teat Dios, quiaj apmüjndiüts ocueaj Teat Dios. At apmüjndiüts maquiüjpaats Teat

Cristo nóiquian leaw apmüünd. Sitiül apmamongochiüts atnej nej tamongoch, quiaj apmajlüyüüts nóiquian najneajay maquiüjpaats.

¹⁸Xique sayaag meáwan leaw apmamongochiüts ningüy cam, aag ayaj nicuajind, cos ajawaats apmajlüyüüts xeyay najneaj alinoic nüt tiül cielo. ¹⁹At meáwan leaw almajlüy tarang Teat Dios, teamacül aaga nüt wüx apmajüiquicharan meáwan micual Teat Dios. ²⁰Cos meáwan leaw tarang Teat Dios, aag ayaj lango majneaj nganüy, ngo matnej tajlüy nomb. Atquiaj ajlüy ajan wüx tajlüy nisoet, lango majneaj. Naleaing tengual acüleran aaga nüt wüx meáwan leaw almajlüy apmajlüy najneajay alinomb. ²¹Alinoic nüt meáwan leaw Teat Dios tarang lango ndrom ombas, apmajlüy najneajay alinomb, atnej micual Teat Dios. ²²Ajawaats meáwan leaw Teat Dios tarang tanomb, nganüy atnej teamamongoch necoy, atnej nop najtaj amongoch necoy wüx apmawiquiach micual nej. ²³Ngome nejíwan quiaj amongochiw ngo majneaj nganüy, pero icootsa aton amongochiüts, masey ajiüraats Nangaj Espíritu ocueaj Teat Dios tiül omeajtsaats. Aag ayaj üüch icoots majawaats apmajlüyüüts najneaj alinoic nüt. Icootsa aiümaats, teamacüliüts aaga nüt wüx Teat Dios apmaquiüüb icoots atanej micual nej, andüy tiül cielo. Quiaj apmajiüraats jayats micuerpojaats. ²⁴Icootsa tajwanaats wüx asoetiüts cos apiüngaats apmüjndiüts leawa teamacüliüts. Pues sitiül lamaxomaats leawa

teamacüliiüts, langondom mapiüngaats tealeámban macüliiüts aag ayaj. ¿Cos jane apmacül müünd leawa lamüünd? ²⁵Pero sitiül ngo maxomaats majawaats aaga leawa teamacüliiüts quiaj, netam maiündaats wüx macüliiüts aag ayaj.

²⁶Atquiaj aton aaga Nangaj Espíritu ocueaj Teat Dios ambeol icoots wüx ngo majawaats nguineay apmasajaats Teat Dios wüx atajcaats orar. Quiaj Nangaj Espíritu apmasaj Teat Dios masey ngo maxomaats poch alndom mandeacaats. ²⁷Teat Dios ajaw omeaatsaran, ajaw nguineay andiüm Nangaj Espíritu wüx atün ocueaj Teat Dios ingow atüniüts, cos nej arang leaw andiüm Teat Dios.

Apmajntsopiiüts wüx cuajantanej

²⁸Icootsa ajawaats meáwan leaw amongochiüts, Teat Dios apmambeol icoots, apmüüch maw najneaj atnej andiüm nej, cos lamapaj icoots mandüjpüüts, marangaats leawa nej andiüm. ²⁹Cos meáwan monyar andeac Teat Dios, ajcüw ayaj Teat Dios tarriiüd nejiw wüx nganaw majlüyiw; tayac nejiw majlüyiw atnej ajlüy Micual nej. Aag ayaj tarang Teat Dios para majlüy Teat Cristo ombas nej tiül meáwan monyar andeac Teat Dios. ³⁰Pues ajcüw leawa Teat Dios tajaw wüx nganaw wijquiamoj apmayariw nej andeac, ajcüw ayaj tarriiüd. Ajcüw leawa Teat Dios tarriiüd quiaj, aton tawün asoetiwi nómban. At ajcüw leawa tawün asoetiwi quiaj, lamüüch nejiw majlüyiw najneajay.

³¹¿Cuane alndom mapiüngaats wüx aag ayaja? Cos sitiül Teat Dios almaquiiüb icoots, nejinguiind ngondom marang alcuane wüx ombasaats. ³²Teat Dios ngo mapiüng wüx, tüüch mamb wüx cruz micual nej mandeow mawün asoetiiüts; aton ngome apmapiüng wüx müüch icoots meáwan leawa lamapiüng apmüüch. ³³Jow nganüy ¿jane apmayac nej asoetiwi leaw lamarriiüd nejiw Teat Dios? Cos Teat Dios nepiüng najneaj ajlüyiw maquiiüjpüw nej. ³⁴¿Jane apmeyac asoetiiütsa? Nejinguiind, cos Teat Cristo tandeow condom tapac alinomb; nganüy ajlüy amb wüx miác Teat Dios niüng tengual masaj Teat Dios mambeol icoots. ³⁵Teat Cristo xeyay ajiür icoots lasta. ¿Nguineay alndom mecueateyoots maquiiüjpaats Teat Cristo? ¿Ngwüy, wüx amongochiüts naéle? ¿Wüx amix omeajtsaatsa xeyaye? ¿Ngwüy, wüx ajcüy majaw icoots nipilana? ¿Wüx aiündaats lopa? ¿Ngwüy, wüx ngo majiüraats apixaatsa? ¿Wüx aliüts tiül naéle, alndom mandeowaatsa? ¿Ngwüy, wüx ambiyaranaatsa? ³⁶Wüx aag ayaj apiüng tiül Mipoch Teat Dios:

Ajcan sayariün indeac, sajlüyiün meáwan nüt atnej laliüc nandeowan;
cos sajlüyiün at xicon sap najon mandeow, matsambaran.

³⁷Pero icootsa, masey amongochiüts meáwan aaga ngo majneaj quiaj, apmajntsopiiüts wüx cuajantanej naél, cos Teat Dios xeyay ajiür icoots lasta. ³⁸Pares xique sajaw majneaj, nicuajind

ngondom müüch macueat majiür
 icoots lasta Teat Dios. Masey
 apmandeowaats, masey aliün
 mapacaats; ata ángeles, nimeech,
 tengwüy leaw amongochiiüts
 nganüy, tengwüy leaw
 apmamongochiiüts oxep nawiür,
³⁹leaw ajlüy cawüx tiül cielo,
 tengwüy leaw ajlüy ningüy wüx iüt,
 tengwüy cuajantanej leaw tarang
 Teat Dios; nicuajind ngondom
 müüch macueat majiür icoots lasta
 Teat Dios cos Teat Cristo tandeow
 mawün icoots wüx.

Teat Dios tayamb nipilan monaw Israel

9 Leawa xique teanasaj icon, aag
 ayaj naleaing, ngo nawaiich,
 cos sayar andeac Teat Cristo. Aton
 Nangaj Espíritu ocueaj Teat Dios
 üüch xic nayaag tiül ximeats
 meáwan aag ayaj naleaing. ²Xique
 xeyay amix ximeats, ngo majneaj
 ximeats. ³Nguiay sayaag malüy
 xique alndom namb tiül castigo
 ingow ambüw micual xefüt, ajcüw
 xecojow, xechijquiaw. ⁴Teat Dios
 xeyay lamambeol micual xefüt
 cos xicon micual xicon cambaj
 Israel. Teat Dios lamaquiiüb xicon
 atanej micual nej, tüüch xexejchiün
 tanomb majawüw nej atnej noic
 ran. Aton tayac poch maquiüjpüw,
 tüüch a Moisés aaga poch müüch
 nejiw majawüw nguineay netam
 marangüw. Aton tüüch nejiw
 mayambüw nej, mäjchiw nej
 omeajtsüw, tasaj nejiw aton
 apmarang meáwan leaw lamapiüng.
⁵Ajcüwa xexejchiün quiaj, imiün
 tiül nejiw tajlüy Teat Cristo, tajiür
 cuerpo atnej meáwan nipilan, pero

naleaing nej Midiosüw meáwan
 leaw almajlüy. Nej netam masoic
 najneajay ajlüy meáwan nüt. Amén,
 atquiaj netam majlüy.

⁶Teat Dios tarang leaw lamapiüng
 tiül Mipoch nej apmarang, pero
 ngome meáwan nipilan micual
 Israel naleaing nipilan israel nejiw.

⁷Aton ngome meáwan micual
 micualüw Abraham naleaing
 micual nejiw Abraham; cos Teat
 Dios tasaj Abraham: “Ajcüwa leaw
 apmasoiquiw naleaing micual, aag
 ayaj apmajlüyiw nawüw tiül micual
 Isaac”. ⁸Aag ayaj apiüng ngome
 meáwan leawa naw tiül micual
 Abraham ajcüw ayaj micual Teat
 Dios; ngwüy, micual Teat Dios
 aag ayaj jane Teat Dios lamapiüng
 apmajlüy micual nej, ajcüw ayaj
 ateoraw tiül micual Abraham. ⁹Cos
 Teat Dios tasaj Abraham: “Wüx
 apmatüch aaga nüt tapiüngas,
 saliüc alinomb, quiaj müm Sara
 apmajiür nop micual nej”, aw.

¹⁰Ngome áagan ayaj, aton wüx
 müm Rebeca mintaj Isaac tajlüy
 teomeaats nej micual nej, tajiür
 micual nej cuüch, micual aweaag
 Isaac minoj nej. ¹¹Wüx nganaw
 wijquiamoj a cuüch, nganaw
 marangüw nicuajind najneaj
 nicuajind ngo majneaj; quiaj Teat
 Dios tarriiüd tiül nejiw leawa nej
 tandiüm marang micual nej, ngome
 aag tarang najneaj tengwüy arang
 ngo majneaj. ¹²Teat Dios tasaj müm
 Rebeca: “Aaga natang tiül a cuüch
 quiaj, apmarang minajiüt chingüy”, aj.
¹³Aag ayaj aton apiüng tiül Mipoch
 Teat Dios, cos Teat Dios apiüng: “Aaga
 Jacob sajiür lasta, nganüy aaga Esaü
 ngo mind najaw”, aw.

¹⁴¿Jowa nganüy cuane apmapiüngaats wüx aag ayaja? ¿Apmapiüngaats Teat Dios arang ngo majneaja? ¡Ngwüy ngondom!

¹⁵Cos Teat Dios tasaj a Moisés: “Sanajiür lasta jane xique sandiüm najiür lasta, sanambeol jane xique sandiüm nambeol”. ¹⁶Aag ayaj ajüiquich nejingund ngondom maxom monajneaj ocueaj Teat Dios por nejáyan quiaj andiüm, at ngome ajcan alcuane arang, aag ayaj cos Teat Dios tandiüm majiür lasta.

¹⁷Wüx aag ayaj apiüng tiül Mipoch Teat Dios, cos Teat Dios tasaj a Moisés masaj a Faraón, aaga natang nenajiüt tiül Egipto: “Tayacas ic merang natang nenajiüt, najüiquich wüx imbas nguineay xique alndom narang cuajantanej sitiül ngo marangüch atnej sandiüm. Aag ayaj sanarang para alndom manguiayiw wüx xique meáwan nipilan wüx iüt”, aw Teat Dios. ¹⁸Atquiaj ajüic nguineay Teat Dios ajüür lasta jane andiüm majiür lasta, aton jane nej andiüm müüch madam omeaats, aag ayaj üüch madam omeaats.

¹⁹Jondot aljane apmasaj xic: “Sitiül naleaing aag ayaj, ¿neol Teat Dios ayac asoet nipilan wüx arangüw ngo majneaja? cos ngondom mbiüjlam leaw andiüm Teat Dios”, maj xic. ²⁰Pero nde mepiüng aag ayaj, ¿cos cuane ic mendiüm mengoch andeac Teat Diosa? Jondot nop xor mendeac masaj nerang nej: “¿Neol terang xic atcüy?” maj. ²¹Nop nerang xor alndom marang leawa nej andiüm marang. Nej alndom marang nop xor natsüjyay ombas, aton alndom

marang alinop nawan tiül ndeor, quiaj ngo matsüjyay ombas.

²²Atquiaj Teat Dios aton alndom müüch majaw nipilan nguineay nej alndom marang leawa nej andiüm. Naleaing nej afüic wüx leaw arangüw monrang ngo majneaj, pero aton nganaw müüch mamongochiw ngo majneaj ajcüwa nipilan leawa laliüc mandroocheran ombasüw. ²³Teat Dios arang aag ayaj majüiquich nguineay nej xeyay najneaj arang wüx ombasaats, cos lamajiür icoots lasta; at lamapiüng majlüyüüts micual nej icoots, majlüyüüts najneajay tiül cielo.

²⁴Teat Dios tayamb icoots aton, ngome ajcüwan a nipilan judío; tayamb nipilan ngome judío aton.

²⁵Atnej tapiüng Teat Dios tiül a nawiig tarang Oseas:

Leawa tanomb ngome xenipilan, nganüy sanasajüw xenipilan; at ajcüwa leaw ngo najiürüw lasta nomb, nganüy sanajiürüw lasta.

²⁶Aton niüng tasajasüw: “Ngome xecambaj icon”, nganüy sanasajüw xecual icon, cos xique Dios almapac.

²⁷Pero Isaías tandeac wüx nipilan israel aton, wüx tapiüng: “Masey apmajlüyiw xeyay micual micualüw Israel atnej wiüüd mbeay ndec, pero naleaing nejiw napateayiw apmawüw wüx asoetiw. ²⁸Cos Teat Dios najénan apmajaw wüx ombasüw meáwan nipilan; apmüüch mamongoch ngo majneaj jane ngo mayar nej andeac”, aw.

²⁹Wüx aag ayaj nde tanomb tandeac Isaías wüx tapiüng:

Sitiül Teat Dios najlüy tiül cielo
y nerang cuajantanej, ngo
mawün wüx nejingund
majlüyiw micual nej,
quiaj xicona landroj ximbasan
atnej meáwan nipilan tiül
ajcüwa cambaj Sodoma y
Gomorra ndrot ombasüw.

**Alndom mawüw wüx
asoetiw nipilan judío**

³⁰¿Cuane apmapiüngaats nganüy?
Sandiüm nasaj icon, ajcüwa nipilan
leaw ngome judíos nganüy alndom
maw asoetiw nejiw nómban. Masey
ngome nejiw ayambüw aag ayaj,
pero naleaing apmaw asoetiw nejiw
sitiül apmayacüw omeajtsüw wüx
Teat Dios. ³¹Pero ajcüwa nipilan
israel leaw teamarangüw atnej
apiüng tiül aaga poch tüünd Moisés,
nejiw ngondom maw asoetiw
nejiw wüx aag ayaj. ³²¿Pero neola?
Cos nejiw masey teamarangüw
atnej apiüng tiül aaga poch tüünd
Moisés, ngo mayacüw omeajtsüw
wüx Teat Dios. Arangüwan, cos
lasap ombasüw wüx cuajantanej
leaw arangüw. Ngo mandiümüw
mayariw andeac Teat Cristo, aaga
apiüng tiül Mipoch Teat Dios nasoiç
“noic piedra najtocharan wüx”.

³³Aag ayaj apiüng Teat Dios tiül
Mipoch nej, cos apiüng:

Xique sanayac wüx tiüc nenüt
Sion noic piedra najtocharan
wüx, najmiücaran wüx;
jangantanej leaw apmayar nej
andeac, ngome apmaxing.

10 Xecojow xechijquiaw,
xique naleaing sayac wüx
ximeaats malüy nipilan israel
mawüw wüx asoetiw nejiw, pares

satün ocueaj Teat Dios mambeol
nejiw. ²Xique alndom napiüng
nejiw xeyay ayambüw Teat Dios
atnej ajlüyay marangüw, pero aag
ayaj ngo matnej apiüng Teat Dios.
³Nejiw ngo majawüw nguineay Teat
Dios tarang para mawün asoetiw
nejiw. Apacüw wüx andiümüw
marangüw cuajantanej leaw ajlüyay
marangüw para mawüw wüx
asoetiw nejiw. Áag ngo mandiümüw
marangüw atnej apiüng Teat Dios.
⁴Cos Teat Cristo tarang meáwan
leaw apiüng tiül aaga poch tüünd
Teat Moisés, nganüy meáwan
monyar nej andeac, apmaw wüx
asoetiw nómban.

⁵Teat Moisés tarang tiül mipoch
nej mapiüng nguineay alndom
majlüyaran najneaj teombas Teat
Dios, cos tapiüng: “Jane apmarang
palan meáwan leaw apiüng tiül a
poch cam apmapac”. ⁶Nganüy leaw
tapiüng nguineay Teat Dios alndom
mawün asoetiüts ajcan ayariiüts
andeac Teat Cristo apiüng: “Nde
mepiüangan tiül imeajtsan: ¿Jane
apmamb cawüx tiül cielo? —cos
aag ayaj atnej para müüch miün
Teat Cristo alinomb—; ⁷tengwüy
mepiüangan: ¿Jane apmamb tiüta?”
—cos aag ayaj atnej majtep Teat
Cristo alinomb imiün tiül mondeow.

⁸¿Nguineay apiüng aag ayaja?
Apiüng: “Aaga poch leaw alndom
mawün isoetiün, aag ayaj ajlüy tiül
imeajtsan, indeacan wüx”. Aaga
poch quiaj leawa sasajan icon
netam meyariün, meyacan wüx
imeajtsan. ⁹Cos sitiül apmepiüng
Teat Jesús, aag ayaj Cristo nej
leawa tapiürang aliüc, aton sitiül
mepiüng tiül imeaats Teat Dios

tapaciüch nej naw tiül mondeow, quiaj apmeriow wüx isoet, lango meamb tiül castigo. ¹⁰Cos wüx nop ayar andeac Teat Jesús con omeaats, quiaj Teat Dios lajneaj majaw nej. Pero aton netam masaj nipilan nguineay tawün nej wüx Teat Jesucristo.

¹¹Tiül Mipoch Teat Dios apiüng: “Meáwan monyar andeac Teat Cristo, ngome apmamongoch alngün monxing”, aw. ¹²Teat Dios ngo mayac nipilan judío pálwüx, nganüy pálwüx nipilan griego, cos nop Dios ajlüy ocueaj meáwan nipilan; nej xeyay ambeol meáwan monyambüw nej. ¹³Aag ayaj aton apiüng tiül Mipoch Teat Dios: “Meáwan jane apmasaj Teat Dios mawün nejiw wüx, aag ayaj apmaw asoetiwi nejiw”. ¹⁴Sitiül nganaw mayariw andeac Teat Cristo, ñguineay alndom masajüw Teat Cristo mawün nejiw wüxe? Sitiül nganaw manguiaiyw wüx Teat Cristo, ñguineay alndom mayariw andeac neje? At sitiül nejinguind ngo mamb masaj nejiw, ñguineay apmanguiaiyw wüx neje? ¹⁵Cos sitiül ngo müjndiw mambüw, ñguineay alndom mandeaciw wüx neje? Wüx aag ayaj apiüng tiül Mipoch Teat Dios: “¡Najneajay oleaj, najneajay arang leaw apmamb masaj nipilan aaga najneaj poch leaw apiüng nguineay Teat Dios alndom mawün nipilan wüx asoetiwi!”

¹⁶Pero naleaing ngome meáwan nipilan ayariw aaga najneajay poch, cos atnej tapiüng teat Isaías: “Teat Dios, nejinguind ngo mayar sandeacan”, aw. ¹⁷Pues jangantanej

alndom mayar aaga najneajay poch wüxan anguiay; y nipilan apmanguiaiyw aaga najneajay poch wüx aljane apmasaj nejiw wüx Teat Cristo.

¹⁸Nganiüy sapiüng: ¿Neol, nganaw manguiaiyw andeac Teat Dios ajcüwa nipilan? ¡Naleaing nejiw lamanguiaiyw! Cos aag ayaj aton apiüng Mipoch Teat Dios:

Meáwan nipilan tiül palpálwüx cambaj lamanguiaiyw andeaciw nejiw, y aaga poch quiaj tanguiaiyaran meáwan wüx a iüt cam.

¹⁹Pero sapiüng alinomb: ¿Jow Israel, ngo majawüw wüx aag ayaja? Ngwüy tajawüw, cos Teat Dios tapiüng tiül aaga poch tüünd Moisés:

Xique sanüüch icon mejcüyiün wüx ombasüw alinoic nipilan imiün alinoic iüt; sanüüch icon mejcüyiün mejawan ajcüwa nipilan ngo mandiumüw manguiaiyw wüx Teat Dios.

²⁰Aton Teat Isaías tapiüng: Ajcüwa nipilan leaw ngo mayambüw xic, taxomüw xic; y leaw ngo matüniw manguiaiy wüx xique, tujchiüs majawüw xic.

²¹Teat Isaías wüx andeac wüx Israel, apiüng: “Pal nüt tandiquias xiwx napajüw mandilileaw mayambüw xic, pero nejiw ngo mandiumüw, ngo mayariw sandeac”, aw Teat Dios.

Altiül nipilan israel tawüw wüx asoetiwi

11 Nganüy sanatün nanguiaiy icon: ¿Cuane ipiügan,

naleaingue, Teat Dios lango mandium micambaj neje Israel? iNgwüy ngome atquiaj! Cos xique aton nawas tiül nipilan israel, acualaats xic teat Abraham, nawas tiül micual teat Benjamín. ²Teat Dios ngome lamacueat minipilan nej, cos nde tanomb tayamb nejiw. ¿Ngwüy ngo mejawan nguineay apiüng teat Elías tiül Mipoch Teat Dios wüx nej tasaj Teat Dios wüx aaga ngo majneaj arangüw Israele? ³Tapiüng: “Teat Dios, lamambiyaw ajcüwa monxey mondeac indeac, lamajarrjichaw meáwan miartül, y xíquian quiaj saliün napac, pero andiümüw mambiyaw xic aton”, aw. ⁴Pero Teat Dios tapiüng: “Aliün najiür ayaíw mil nipilan leaw ngo maquiejliw micosüw nejiw teombas aaga narangüch dios nenüt Baal”, aw Teat Dios. ⁵At nganüy aliün majlüy noic ajlüy nipilan leaw Teat Dios tarriiüd nde ajneaj omeaats, andiüm mambeol nejiw. ⁶Cos Teat Dios tajiür nejiw lasta, quiaj tayamb nejiw majlüyiw micual nej; y wüx arang aag ayaj, quiaj ajüic nejiw ngo marangüw nicuajind para maxomüw aaga monajneaj quiaj. Cos sitiül aljane netam marang aleaic, quiaj ajüic ngome üündan.

⁷¿Condom cuane apmapiüngaats? Alndom mapiüngaats altiül nipilan israel tandiümüw maw asoetiw nejiw, pero ngo maxomüw; áagan ajcüwa leaw Teat Dios tarriiüd, tajwan asoetiw nejiw; pero alegüy nipilan tadam omeajtsüw. ⁸Atquiaj apiüng tiül Mipoch Teat Dios: “Teat Dios tüüch nejiw majlüyiw atnej ngondom mayambüw omeajtsüw wüx nej; ajlüyiw atnej nop somb

ngo maxom majaw; ajlüyiw atnej nop laag ngo manguiaj. Atquiaj aliün majlüyiw nganüy”, aw. ⁹Aton teat David tapiüng wüx nejiw:

Ich mandrooch nej ombasüw,
cos palüy ambüw tiül nangos
nüt.

Ich mandeowüw atnej cüet
andeow wüx asap nej ndoc
wüx ngo mateots andeow.

Ich mamongochiw leaw netam
nejiw.

¹⁰Ich majlüyiw atnej nesomom
oniüjcüw, ngo majawüw
cuane teamarangüw.

Ich mamongochiw ngo majneaj
meáwan nüt atnej nop naxey
anmejquien wüx amal naüm.

**Nguineay alndom mawüw wüx
asoetiw nipilan ngome judío**

¹¹Nganüy satün nanguiaj: ¿Jowa cambaj Israel, ajcan ngo mayariw andeac Teat Dios, lamacueat nejiw nómban? iNgwüy ngo matquiaj! Cos nejiw tarangüw ngo majneaj, ngo mayariw andeac Teat Cristo, quiaj Teat Dios tawün wüx asoetiw xeyay nipilan ngome judío. Atquiaj tarang Teat Dios müüch mandiumüw a nipilan judío mawün nejiw wüx asoetiw Teat Dios. ¹²Sitiül ajcan nipilan judío ngo mayariw andeac Teat Cristo, pares Teat Dios tawün wüx asoetiw xeyay nipilan ngome judío, icuantemas wüx nejiw apmayariw andeac Teat Cristo xeyay najneajay apmajlüyiw!

¹³Nganüy icona ngome nipilan judío icon, sanasaj icon Teat Dios tayac xic namb nasaj icon wüx Mipoch Nej, xique sayac wüx ximeats narang najneaj leaw

tüjndiüs narang. ¹⁴Xique sandiüm, malüy micual xefüt majawüw nguineay iyamban Teat Cristo, y mandüümüw aton mayariw andeac nej, para mawüw wüx asoetiw.

¹⁵Teat Dios tawün wüx asoetiw xeyay nipilan ngome judío, cos nej tacueat a cambaj Israel. Jow nganüy wüx Teat Dios apmawün wüx nipilan judío, ¿nguineay apmajlüy? Apmajlüy najneajay, atnej wüx apacaran jane landeow. ¹⁶Sitiül aaga pan narangüch ombas apmajmelarang nichech ocueaj Teat Dios, pues aldemas pan nangaj aton. Sitiül noic owil xiül almapac y nangaj mioxiih nej, mipüüig nej aton almapac, nangaj.

¹⁷Altiül nipilan judío ajlüyiw atnej noic owil najneaj xiül nenüt olivo; nganüy icona nipilan ngome judío ijlüyiün atnej noic owil olivo najntsopeáyan tiül xiül. Pues tandojquiüt mipüüig a najneaj xiül olivo quiaj, condom tapech mipüüig najntsopeáyan xiül wüx aaga najneaj xiül quiaj. Nganüy almapac mipüüig aaga najntsopeáyan xiül cos ayar miyow mioxiih aaga najneaj olivo quiaj. ¹⁸Nganüy icona nipilan ngome judío, nde merangrangayon wüx mejawan nipilan judío. Ich leaam imeajtsan aaga newün isoetiün ngome naw tiül icona; mioxiih nej nipilan judío. Icona ngo meajchiün mapac aaga xiül; más naleaing mioxiih aaga najneaj xiül üüch icon mepacan.

¹⁹Jondot nganüy icona nipilan ngome judío apmepiüangan: “Naleaing, pero Teat Dios tandooig talox ningüün nipilan judío para

mapech xicon wüx; nganüy sajlüyiün najneajay ngo mat nejiw”, merawan.

²⁰Naleaing, pero icona ngome alwüx ijneajiün, cos Teat Dios tandooig nejiw, tacueat nejiw ajcan ngo mayariw andeac. Nganüy icona, Teat Dios lamawün icon wüx isoetiün cos teyariün andeac nej. Pero nde merangrangayon mejawan nejiw, netam mermbolan mendüyiün Teat Dios. ²¹Cos sitiül Teat Dios ngo majiür lasta mawün wüx omeaats nej leawa tarangüw nipilan judío, cuantemas te icona ngome apmajiür icon lasta sitiül ngo meyariün nej andeac. ²²Nganüy ich leaam imeajtsan Teat Dios xeyay najneaj omeaats, pero at aton alndom majcüy, mapaj ocueajiiüts. Naleaing xeyay tajcüy majaw jane ngo mayar nej andeac, pero tajiür icon lasta. Nej ngome apmacueat majiür icon lasta sitiül tanaámb meyariün andeac nej, pero sitiül ngwüy, nej apmacueat icon aton. ²³Pues nejiw nipilan judío, ndot apmandilileaw mayariw andeac Teat Dios, nej apmaquiüüb nejiw mambeol nejiw alinomb. Aag ayaj atnej apmapech nejiw alinomb tiül aaga najneaj owil olivo. Cos Teat Dios alndom marang leaw nipilan ngondom marang. ²⁴Sitiül Teat Dios lamaquiüüb icon leaw ngome judío, mejlüyiün micual nej nóiquian mequiüjpan nipilan judío cos teyariün nej andeac; cuantemas nganüy apmaquiüüb alinomb nipilan judío leawa tacueat, sitiül apmayariw nej andeac.

**Ndójuwüx a cambaj Israel
apmajwanüw wüx asoetiw**

²⁵Xechijquiaw xecojow, xique sandiüm nüüch icon mejawan leaw

Teat Dios ngo müüch icon mejawan nde tanomb; pero nde mepiüangan icona xeyay lerndüyiün. Cos netam mejawan masey altiül nipilan judío xowüy ladam omeajtsüw nganüy; pero aag ayaj apmajlüy leaw apalam jane apmayariw andeac Teat Dios monaw tiül nipilan ngome judío. ²⁶Condom Teat Dios apmawün wüx asoetiwi cambaj Israel, atnej nomb tapiüng Teat Dios tiül minawiig nej, cos apiüng:

Aaga newün wüx asoeteran aliüc imiün Sion,
quiaj apmawün asoetiwi meáwan micual a Jacob, macueatiw arangüw ngo majneaj.

²⁷ Quiaj apmümb majlüy meáwan leaw tasajasüw apmajlüy, wüx sanawün asoetiwi nejiw.

²⁸ Cos cambaj Israel ngo mayariw nej andeac, áag tacueat nejiw Teat Dios, quiaj tawün icon wüx isoetiün. Naleaing Teat Dios aliün majiür lasta Israel cos tarriiüd mixejchiw nejiw. ²⁹ Teat Dios ngo mangowüüch leaw nej lamapiüng apmarang, cos leawa nej lamapiüng apmüüch, aag ayaj apmüüch. At leaw nej lamapiüng micual nej, aag ayaj micual nej. ³⁰ Icona nipilan leaw ngome naw tiül Israel, icona nomb ngo meyariün andeac Teat Dios, pero nganüy lamajiür icon lasta, cos nipilan judío ngo mayariw nej andeac. ³¹ Nganüy icona lamajiür icon lasta Teat Dios cos nipilan judío ngo mayariw andeac nej. Ndoj nejiw apmajiürüchiw lasta atnej tajiür icon lasta Teat Dios. ³² Teat Dios tacueat meáwan nipilan leaw ngo mayariw nej andeac. Condom meáwan atotow tajiür nejiw lasta.

³³ Quiaj ajawaats nguineay Teat Dios xeyay najneajay ajlüy, xeyay nendüy, xeyay axom omeaats. Nejingüind ngondom majaw nguineay teamapiüng apmarang, cuane apmarang. ³⁴ “¿Jane ajaw cuane alwüx omeaats nej Teat Diosa, ngwüy jane nesaj nej cuane netam maranga?” ³⁵ “¿Jane alndom mangüy Teat Dios, müüch nej cuajantaneje?” ³⁶ Nejingüind, cos meáwan leaw almajlüy naw teowix nej, nej tarang; alteowix nej meáwan leaw almajlüy. Pares netam mayarich andeac Teat Dios meáwan nüt. ¡Amén!

Netam marangaats casa Teat Dios

12 Nganüy xecojow xechijquiaw, cos Teat Dios lamüüch icoots xeyay mimonajneaj nej, áag sasaj icon nganüy netam meajchiün Teat Dios imeajtsan y micuerpojan, para mejlüyiün at icon noic nichech almapac, mejlüyiün nangaj, atnej andiüm Teat Dios. Cos aag ayaj najneajay majaw Teat Dios merangan. ² Nde mendüjpiün wüx merangan ngo majneaj atnej arangüw meáwan nipilan nganüy cam. Netam mengowüjchiün meáwan ngo majneaj leaw iyajcan tiül imeajtsan, merangan najneaj, ngo matnej irangan nomb. Cos atquiaj alndom mejawan cuane andiüm Teat Dios merangan. Nej andiüm merangan najneaj, merangan palan; aag ayaj andiüm majaw.

³ Por mimonajneaj nej Teat Dios tayac xic nasaj icon: Nejingüind tiül icona nde mapiüng tiül omeaats nej alwüx ajaw ngo matnej alinop.

Netam meyajcan icona ijawan atow nej Teat Dios lamüüch anopnop majaw leaw netam majaw, para merangan leawa nej andiüm. ⁴Cos atnej icootsa ajawaats, micuerpojaats ajiür oleaj, ajiür owix, ajiür omal, ajiür oniiüg, ajiür olaag, ajiür oxing, ajiür ombeay, pero ngome meáwan aag ayaj noic nej arangüw. ⁵Atquiaj aton icootsa, masey xeyay ajlüyüüts, pero ajlüyüüts nóiquian wüx Teat Cristo, atnej majlüyüüts nop nipilan.

⁶Aton cos Teat Dios lamajiür icoots lasta, lamüüch icoots anopnopoots cuane alndom marangaats palpálwüx. Netam marangaats atnej lamüüch icoots Teat Dios marangaats. Sitiül Teat Dios lamüüch nop mandeac andeac nej, netam mandeac leaw Teat Dios asaj nej, nde mayac wüx. ⁷Tengwüy sitiül Teat Dios lamüüch alinop ndoj ombas mambeol, ich mambeol najneajay. Tengwüy sitiül Teat Dios lamüüch alinop ndoj ombas maquiaach, ich mayac omeaats wüx aquiaach. ⁸Tengwüy sitiül Teat Dios lamüüch alinop ndoj ombas müüch mapac omeaats alinop, ich müüch mapac omeaats alinop najneajay. Tengwüy sitiül aljane lamüüch nej Teat Dios majiür, ich mapac omeaats mambeol leaw ngo majiür. Tengwüy sitiül Teat Dios lamüüch aljane marang natang, ich mayac omeaats wüx marang atnej netam. Aton sitiül aljane lamüüch nej Teat Dios majiür lasta alinop, ich mapac omeaats wüx mambeol.

**Leaw netam marangüw
monyar andeac Teat Cristo**

⁹Ijiüran lasta meáwan nipilan con imeajtsan, nde merangan.

Nde mendiüman merangan leaw ngo majneaj, ngwüy irangan leawa najneaj. ¹⁰Aton ijiürayon lasta nop alinop atnej mejiüran micojon michijquian, ermbeolayon.

¹¹Leaw irangan, iyacan wüx imeajtsan merangan najneaj. Nde merangan anch wüx irangan minajiüt Teat Dios.

¹²Ich mapac imeajtsan, icüliün Teat Cristo imiün tiül cielo. Netam meiücan wüx imongochiün ngo majneaj, tanaám itajcan orar, nde mecueatiün.

¹³Imbeolan monyar andeac Teat Dios sitiül aljane ngo majiür. Ijchan maxood iniüangan monyar andeac Teat Dios napeay miün.

¹⁴Nde mendeacan ngo majneaj wüx ombas nipilan leaw arangüw ngo majneaj wüx imbasan, itüniün majiürüw mimonajneaj Teat Dios, nde mepaijchan nejiw.

¹⁵Ich mapac imeajtsan mequiüjpan leaw apac omeaats, at jane ajiünts, ijiünts mequiüjpan aton.

¹⁶Ijlyüiün nóiquian nop alinop, nde merangrangayon atnej alwüx ijawan, pero ijlyüiün at icon nipilan leaw ajüic ngo membeat. Nde mepiüangan tiül imeajtsan icona nerndüyüün.

¹⁷Nde merangan ngo majneaj wüx ombas jane arang ngo majneaj wüx imbasan; iyamban imeajtsan nguineay merangan leaw najneaj majaw nipilan. ¹⁸Ipacan wüx sitiül alndom mejlüyüün najneaj mequiüjpan meáwan nipilan. ¹⁹Xecojow xechijquiw, sitiül aljane arang ngo majneaj wüx imbasan, nde mepalüchiün ombas. Ich majlüy,

Teat Dios apmepalüch. Cos apiüng tiül Mipoch Teat Dios: “Xique saniüch mangüy, xique sanapalüch ombas”, aw. ²⁰Aton apiüng: “Sitiül aljane najcüy majaw ic mind üet, pues iich; tengwüy sitiül mind anganeow yow, iich manganeow. Cos wüx apmerang aag ayaj, quiaj apmaxing xeyay cos terang wüx ombas najneaj”, aw. ²¹Nde meaach majntsop ngo majneaj wüx imbas; netam merang najneaj masey aljane arang ngo majneaj wüx imbas.

13 Meáwan nipilan netam mayar andeacüw monajiüt. Cos Teat Dios neyac nejiw, nej neech nejiw majiürüw najiüt. ²Jane ngo mayar andeacüw monajiüt, aag ayaj ngo mayar andeacüw leaw tayac nejiw Teat Dios. Jane ngo mayar andeac monajiüt, nejiw apmamongochiw ngo majneaj. ³Nop nerang najneaj ngo metam mimbol mandüy monajiüt; pero nop nerang ngo majneaj netam mimbol mandüy monajiüt. ¿Jowa ique, ngo mendiüm mermbol mejaw monajiüta? Pues irang najneaj, quiaj monajiüt apmandeacüw najneaj wüx imbas. ⁴Teat Dios tayac nejiw mambeolüw ic, pero sitiül apmerang ngo majneaj, quiaj netam mermbol; cos monajiüt alndom müjchiw ic memongoch ngo majneaj. Teat Dios tüüch nejiw marangüw aag ayaj; tayac nejiw müjchiw mangüyiw monrang ngo majneaj leaw arangüw. ⁵Netam meyariün andeacüw monajiüt, ngome ajcan ermbolan müjchiw icon memongochiün ngo majneaj, netam merangan cos tiül imeajtsan ijawan netam merangan najneaj.

⁶At netam mengüyiün leaw atüniw ocueaj cambaj, cos Teat Dios tayac nejiw marangüw najiüt ocueaj cambaj.

⁷Ingüyiün meáwan leaw ijüchiün. Netam memiücüchiün leaw atüniw; at netam memiücüchiün leaw netam mengüyiün monajiüt. Aton leaw netam meyariün andeac, iyariün andeac; leaw netam mesajan najneajay ajlüy, netam mesajan najneajay ajlüy. ⁸Nde mejüchiün alinop, aton netam mejiüran lasta nipilan meáwan nüt. Cos leaw ajiür lasta alinop, aag ayaj arang palan atnej apiüng tiül aaga poch tüünd Moisés. ⁹Cos tiül aaga gajpowüw poch apiüng: “Nde mejiür minajtaj, nde mejiür minaxey, nde membiy nipilan, nde merneed, nde mewüy ombasaran, nde mendiümdiüm ocueaj alinop”, aw. Meáwan aaga poch quiaj, at alegüy poch leaw alfünan, aton apiüng andüy wüx aaga poch leaw apiüng: “Netam mejiürayon lasta atnej iquiáyan quiaj merjiürüy lasta”, aw. ¹⁰Cos sitiül ajiürayoots lasta, quiaj ngo mandiümaats marangaats ngo majneaj wüx alinop. Aag ayaj ajüiquich sitiül ajiürayoots lasta, quiaj arangaats palan atnej apiüng tiül aaga poch tüünd Moisés.

¹¹Aag ayaj netam marangaats, cos ajawaats acüliüts tiül nipilan monrang ngo majneaj. Nganüy netam mapacaats, cos Teat Cristo aliüc mawün icoots wüx, laliüc matüch a nüt mapeay, ngo matnej wüx nüt ayariiüts andeac nej.

¹²Minütiiüts ajlüyiüts ningüy wüx a iüt cam, aag ayaj tequech atnej

noic ongwiiüts. Aaga nüt aliüic Teat Cristo laliüic matüch. Nganüy netam macueatiiüts marangaats meáwan ngo majneaj arangüch tiül pojniün, marangaats leaw najneaj arangüch tiül ran. ¹³Netam marangaats leaw najneaj atnej majlüyiiüts tiül ran. Ngondom mangüniüts majlüyiiüts tiül alngün nangos nüt, ngondom majiüraats minajtajaats, minaxeyiiüts. At ngondom mitsojoots micuerpojaats, marangaats cuajantanej ngo majneaj. At ngondom majcüyiiüts majawaats nop alinop, ngondom mayajcaats ngo majneaj ajcan ngo majiüraats leaw ajiür alinop. ¹⁴Ingow aag ayaj, netam müjchiiüts nejay Teat Cristo mambeol icoots ngo mayacaats omeajtsaats wüx ajcüwa ngo majneaj quiaj leaw micuerpojaats andiüm mayac icoots wüx.

Nde mendeac wüx ombas alinop

14 Sitiül aljane lamayar andeac Teat Cristo, pero naleaing nganaw majaw xeyay, iquiiüjpan najneájan tiül icona, nde mendeacndeacan wüx leaw nej nganaw majaw. ²Cos altiül ajaw alndom müeteran matsaramb cuajantanej, pero altiül leaw nganaw majaw xeyay wüx Mipoch Teat Cristo, apiüng áagan soex alndom müeteran. ³Jane lamajaw alndom müeteran matsaramb cuajantanej, ngondom maneoc ombas leaw ngo müet meáwan aag ayaj. At leaw ngo müet meáwan aag ayaj ngondom mandeac ngo majneaj wüx ombas leaw üet cuajantanej, cos Teat Dios lamawün

nej asoet aton. ⁴Nganüy sanasaj ic, ¿neol tendeac ngo majneaj wüx ombas nop nerang minajiüt alinopa? Ngo majneaj mendeac aag ayaj, cos nej ngome minajiüt arang, nej arang minajiüt Teat Dios. Sitiül nej arang najneaj tengwüy arang ngo majneaj, Teat Dios apmajaw wüx aag ayaj, ngome ique. Nej alndom marang najneaj, cos Teat Dios apmambeol nej.

⁵Nop apiüng noic nüt alwüx atam mayambüch Teat Dios ngo matnej alinoic; pero alinop apiüng: Ngwüy, meáwan nüt atanej ajlüy, aw. Naleaing, wüx aag ayaj meáwan anopnop ich marang leaw nej ayaag tiül omeaats najneaj. ⁶Cos leaw nepiüng noic nüt alwüx atam mayambüch Teat Dios, aag ayaj najneaj, ngo majiür nicuajind, cos ayamb Teat Dios. At leaw nepiüng meáwan nüt atanej alndom mayambüch Teat Dios, aag ayaj najneaj aton, cos ayamb Teat Dios. Aton leawa andüy matsamb cuajantanej natsambaran, aag ayaj najneaj majaw Teat Dios, cos üüch gracias Teat Dios, at leaw ngo mandüy matsamb leaw natsambaran, aag ayaj najneaj aton majaw Teat Dios, cos nej üüch gracias Teat Dios wüx apmüet.

⁷Nejinguind icootsa ngondom mapiüngaats icóotsan quiaj nguineay apmapacaats oxep nawiür, at nguineay apmandeowaats.

⁸Cos sitiül almapacaats, alndom marangaats leawa Teat Dios andiüm; sitiül apmandeowaats, aag ayaj cos Teat Dios andiüm. Atquiaj masey almapacaats masey landeowaats ajlüyiiüts ocueaj Teat

Dios. ⁹Cos Teat Cristo tandeow ndoj tapac alinomb para marang natang ocueajiw meáwan nipilan, masey landeow, masey almapac.

¹⁰¿Jowa ique, neol teyambyamb cuane asoet alinopa? ¿Neol teneoc ombasiw micojow michijquiawa? Cos ajawaats alinoic nüt apmajlüyüüts nóiquian niüng ajlüy Teat Cristo, majaraw wüx cuane tarangaats. ¹¹Atquiaj ajlüy tiül Mipoch Teat Dios, niüng apiüng:

Cos naleaing xique salnapac,
meáwan nipilan apmaquiejliw
micosüw nejw tiximbas.

Meáwan anopnop apmapiüngüw
xique Teat Dios, aw.

¹²Quiaj meáwan anopnopoots netam masajaats Teat Dios cuane tarangaats.

**Nde meyac wüx marang
ngo majneaj alinop**

¹³Pares netam macueatiiüts mayambyambaats nisoet wüx ombas nop alinop. Netam mayambaats nguineay marangaats najneaj, ngana müjchiiüts majtoch alinop micojoots michijquiaats, müjchiiüts majiür nisoet. ¹⁴Xique sayaag meáwan natsaramb najneaj matsambaats, cos Teat Jesús lamüüch xic nayaag atquiaj. Pero naleaing, aljane nepiüng almajlüy natsaramb ngondom matsamb, quiaj ngo majneaj sitiül nej apmatsamb aag ayaj, cos netam marangüch leaw apiüng omeaats. ¹⁵Sitiül icona wüx itsamban cuajantanej, quiaj alinop mihermanojan apmamix omeaats, quiaj apmajüic icona ngo mejiüran nej lasta. Ijawan, nde meajchiün

majcüy wüx leaw iretiün, ngana macueat andüüb Teat Cristo, cos Teat Cristo tandeow mawün nej wüx aton. ¹⁶Nde meajchiün manderac ngo majneaj wüx aaga najneaj leaw irangan. ¹⁷Cos Teat Dios ngo metam nej leaw inganeowan, leaw itsamban; pero leaw netam nej, aag ayaj leawa asaj icon merangan. Irganan najneaj, ijlüyüün nóiquian nop alinop, mapac imeajtsan atnej andiüm Nangaj Miespíritu nej. ¹⁸Cos sitiül atquiaj irangan minajiüt Teat Cristo, Teat Dios najneajay majaw icon, at nipilan aton apmapiüngüw najneaj irangan.

¹⁹Icootsa netam marangaats najneaj, ngo majcüyüüts majawaats nop alinop; netam mambeolaats nop alinop mayacaats omeajtsaats wüx Teat Cristo. ²⁰Nde meajchiün aljane majcueat minajiüt Teat Dios wüx nüetaran. Naleaing meáwan nüetaran najneaj müeteran. Nganüy sitiül apmeyacan wüx naél alinop wüx ajaw leaw itean, aag ayaj mbich ngo majneaj. ²¹Najneaj sitiül ngo metsamban onij, sitiül ngo menganeowan yow neech mangüneran, aton sitiül ngo merangan nicuajind leaw alndom mayac wüx naél alinop. Nde merangan leaw alndom müüch nop mandüy wüx marang ngo majneaj. Nde merangan leaw alndom müüch machiw omeaats alinop. ²²Meáwan anopnop nejáyan quiaj ich majaw nguineay ayar andeac Teat Dios, nguineay andiüm Teat Dios majaw marang. Najneajay apac omeaats leaw ngo metam machiw omeaats wüx leaw arang. ²³Pero naleaing

sitiül ichiwean imeajtsan wüx leaw itean itsamban, aag ayaj üüch icon mejiüran nisoet, cos iyajcan aag ayaj ngo majneaj. Meáwan leaw irangan sitiül ichiwean imeajtsan wüx, ngo mejawan sitiül najneaj tengwüy ngo majneaj, aag ayaj nisoet sitiül irangan.

**Ijchan majneaj omeaats
alinop, ngome icónan quiaj**

15 Icootsa leaw lamajawaats wüx Mipoch Teat Dios xeyay netam mambeolaats leaw aliün mapateay ajaw, ngondom marangaats leaw andiümaats. ²Meáwan anopnopoots netam marangaats atnej andiüm alinop; aag ayaj apmambeol nej apmüüch nej mapac omeaats wüx Teat Dios. ³Cos nej Teat Cristo ngome tarang leaw andiüm; nej tarang atnej apiüng tiül Mipoch Teat Dios, cos apiüng: “Meáwan ngo majneaj leaw asajüw ic, leaw arangüw, tiün andüy wüx ximbas”. ⁴Cos meáwan leaw tarangüch tiül Mipoch Teat Dios tanomb, aag ayaj tarangüch maquiaacheranaats wüx. Aag ayaj ambeol icoots majawaats majneaj wüx leaw teamacüliüts, müüch icoots maiücaats wüx, majawaats apmambeol icoots Teat Dios. ⁵Malüy Teat Dios neech mapac omeaatsaran, neech icoots maiücaats wüx cuajantanej, müüch icoots majlüyüüts nóiquian omeajtsaats nop alinop atnej Teat Cristo andiüm. ⁶Quiaj nóiquian masajaats najneajay arang Teat Dios miteat Miteatiüts Teat Cristo.

**Tasoiquiw nipilan ngome judío
alndom mawüw wüx asoetiw**

⁷Atquiaj icona erndeacan mequiüjpan nop alinop, ijiürayon

lasta atnej Teat Cristo ajiür icoots lasta. Quiaj apmanderac najneaj wüx Teat Dios. ⁸Naleaing sasaj icon, Teat Cristo tiün mambeol nipilan judío majüiquich naleaing Teat Dios lamarang leaw lamapiüng apmarang. Atquiaj tarang Teat Cristo para alndom majlüy leaw Teat Dios tasaj tanomb xexejchiün. ⁹Aton Teat Cristo tiün para mapac omeajtsüw mayambüw Teat Dios ajcüwa nipilan ngome judío, cos ajiür nejiw lasta. Atnej apiüng tiül Mipoch Teat Dios:

Xique sanandeaac wüx minüt tiül nipilan ngome judío, sanataag cantar himnos wüx ique.

¹⁰Apiüng alinoic tiül Mipoch Teat Dios:

Ich mapac imeajtsan icona nipilan ngome judío nóiquian mequiüjpan nipilan judío.

¹¹At apiüng alinomb:

Icona nipilan monaw palpálwüx iüt isajan Teat Dios najneajay ajlüy.

Aton meáwan nipilan indeacan guineay najneajay arang Teat Dios.

¹²Isaías aton tarang wüx nawiig:

Apmajmel nop nenajiüt naw tiül micualüw micual Isaí, nej apmajlüy wüx palpálwüx iüt; nejiw apmacüliw aaga nenajiüt quiaj mambeol nejiw.

¹³Malüy Teat Dios, aaga nembeol meiücan wüx leaw almajlüy, müüch icon mapac imeajtsan xeyay, mejlüyiün najneaj mejawan nop alinop, meyacan imeajtsan wüx nej.

Quiaj aaga Nangaj Espíritu ocueaj Teat Dios apmüüch icon meücan wüx, ngana paxiüm mecüliün leaw temecüliün.

¹⁴Xecojow xechijuiaw, xique sawaw majneaj icona xeyay najneaj imeajtsan, at ijawan nguineay alndom mepajan ocueaj nop alinop. ¹⁵Naleaing tiül a nawiig cam nguiaj tayacas tiül napacpac poch nüüch leaam imeajtsan wüx meáwan aag ayaj. Teat Dios tajiür xic lasta; ¹⁶tayac xic narang najiüt ocueaj Teat Cristo, nasaj nipilan ngome judío mayariw andeac Teat Dios, para majlüiyw at nejiw noic najneajay nichech leawa Teat Dios andiüm. Cos Nangaj Espíritu lamüüch nejiw majlüiyw ocueaj Teat Dios.

¹⁷Xique nganüy xeyay apac ximeaats wüx aaga najiüt lanarang ocueaj Teat Dios, cos sajlüy nóiquian naquiüüb Teat Cristo.

¹⁸Xique ngo nandiüm napiüng wüx alinoic najiüt, sandeac áagan wüx najiüt ocueaj Teat Cristo, cos nej ambeol xic nüüch mayariw andeac nej ajcüwa nipilan ngome judío. Nejiw andüjpiw Teat Cristo wüx leaw sandeac, at wüx leaw Teat Dios üüch xic narang. ¹⁹Cos Nangaj Espíritu ocueaj Teat Dios tüüch xic narang ateócan leaw ngome aag ajaraw. Atquiaj tasajas nipilan nguineay Teat Cristo awün nisoet, nawas tiül cambaj Jerusalén sajüy tiül meáwan cambaj leaw tatüchiüs tiül iüt Ilríco. ²⁰Xique sayamb namb nasaj nipilan niüng nganaw manguiaiyw aaga najneaj nanderac wüx Teat Cristo, ngana narang najiüt niüng alinop

lamawitich marang. ²¹Tarangas atnej larangüch tiül Mipoch Teat Dios, cos apiüng:

Apmajawüw nej ajcüwa
leawa nómban ngome áag
masoiquiw wüx nej,
jane nganaw manguiaiyw wüx
nej, nejiw apmayariw andeac
nej.

Teat Pablo apiüng apmamb andüy Roma

²²Pares ngo matüch namb najaw icon, masey xeyay tandiümas namb. ²³Pero nganüy cos lanandondoch xenajiüt ocueaj Teat Dios tiül aaga cambaj cam, aton cos lamajiür xeyay neat sandiüm namb najaw icon; ²⁴nganüy sapiüng wüx sanamb España sanamong niüng jilüiyün. Quiaj apmandeacaats maquiüjpaats nop alinop, mapac omeajtsaats nóiquian. Condom sandiüm membeolan xic namong namb más ninguiün. ²⁵Nganüy ombas sanamb Jerusalén najoy mamb tomiün nambeolüw mondüüb Teat Cristo tiül Jerusalén. ²⁶Cos mondüüb Teat Cristo monaw tiül iüt Macedonia, at monaw tiül iüt Acaya tapiüngüw najneaj mamiücüchiw quiriw tomiün mambeolüw mondüüb Teat Cristo leaw ngo majiür, monlüy Jerusalén. ²⁷Naleaing nejiw tapiüngüw najneaj mambeolüw leaw ngo majiür, monlüy tiül Jerusalén, cos nejiw masey ngome judío nejiw, tündiw aaga najneajay mipoch Teat Cristo. Nganüy nejiw aton netam mambeolüw mondüüb Teat Cristo monlüy tiül Israel wüx cuajantanej leaw ngo majiürüw. ²⁸Nganüy sapiüng wüx landoj xiün

nayac meáwan tomiün, nandondoch leaw teanarang, quiaj sanamong niüng ijlüiyün, ndoj sanamb España.

²⁹Xique saw majneaj nguineay Teat Cristo apmambeol xic, müüch mapac ximeaats xeyay wüx sanapeay niüng ijlüiyün.

³⁰Xecojow xechijquaw, nganüy satün icueajiün membeolan xic, metüniün ocueaj Teat Dios mambeol xic xeyay. Aag ayaj sasaj icon, cos ajlüiyüüts nóiquian maquiüjpaats Miteatiüüts Teat Cristo, aton cos ajüürayoots lasta atnej andiüm Nangaj Espíritu ocueaj Teat Dios.

³¹Itüniün ocueaj Teat Dios mambeol xic, ngana masapüw xic nipilan moncüy majaw xic monlüy tiül iüt Judea. Aton itajcan orar para mayariw najneájan leaw sajoy mamb nüüch ajcüwa mondüüb Teat Cristo leaw ngo majiür, ajcüwa monlüy tiül Jerusalén. ³²Atquiaj alndom natüch niüng ijlüiyün mapac ximeaats naquiüüb icon, sitiül Teat Dios andiüm. Quiaj sanaxood quiriw naquiüüb icon. ³³Teat Dios, aaga neech monajneaj tiül omeajtsaats majlüy maquiüüb icon. Amén.

Atepeay anopnopo

16 Nganüy sanüüch mamb müm Febe, apmamb quiaj majaw icon, ingochiün najneaj. Cos nej ajüür najiüt tiül mondüüb Teat Cristo monlüy tiül cambaj Cencia. ²Itepeayiün, ingochiün najneájan atnej netam mangocheran meáwan monyar andeac Teat Dios. At imbeolan wüx cuajantanej netam nej, cos nej lamambeol xeyay jangantanej; ata xique aton lamambeol xic.

³At aton itepeayiün teat Aquila at mintaj nej müm Priscila. Nejiw xeyay tambeolüw xic wüx sarang minajiüt Teat Cristo. ⁴Cos nejiw aton tajlüiyw tiül xeyay naél wüx tambeolüw xic ngana mambiy xic nipilan. Pares süüch nejiw gracias xeyay, ngome xíquian quiaj, aton meáwan monyar andeac Teat Cristo leaw ngome judío nejiw, üjchiw nejiw gracias aton.

⁵Itepeayiün meáwan mondüüb Teat Cristo leaw canchiüjow aniüngüw teat Aquila. At itepeayiün xeamigo teat Epeneto, cos nej ombas mayar andeac Teat Cristo tiül iüt Acaya.

⁶Itepeayiün aton müm María, cos nej lamarang xeyay najiüt ocueaj Teat Dios tiül icona. ⁷At itepeayiün teat Andrónico at teat Junias, ajcüw ayaj micual xefüt, aton taquiüübasüw tiül manchiüc. Nejiw xowüy ajüür nejiw lasta meáwan apóstoles, aton ombas mayariw andeac Teat Cristo, teoj a xique.

⁸Itepeayiün teat Amplias, xique xowüy sajiür lasta wüx minüt Teat Dios. ⁹Itepeayiün teat Urbano, nej nembeol xicon wüx minajiüt Teat Cristo. At a teat Estaquis itepeayiün. Xique xowüy sajiür lasta. ¹⁰Itepeayiün teat Apeles, nej xeyay ajüiquich andüüb Teat Cristo. At itepeayiün meáwan acualaats teat Aristóbulo. ¹¹Itepeayiün teat Herodión, micual xefüt. At itepeayiün acualaats teat Narciso, ajcüw monyar andeac Teat Cristo. ¹²Itepeayiün müm Trifena, at müm Trifosa, nejiw mimonrang minajiüt Teat Cristo; átan mimümaats Pérsida, cos nej lamarang xeyay najiüt aton. ¹³Itepeayiün teat Rufo, nej nop naxey leaw tarriiüd nej Teat Cristo. Aton mimüm nej itepeayiün, cos

ajlŷy atnej xemŷm aton. ¹⁴Itepeayiŷn teat Asŷncrito, teat Flegonte, mŷm Hermas, teat Patrobas, teat Hermes, at meáwan leaw aquiŷjŷpŷw nejiw itepeayiŷn aton. ¹⁵Itepeayiŷn teat Filólogo, mŷm Julia, teat Nereo, at michiig najtaj nej. Aton itepeayiŷn teat Olimpás at meáwan monyar andeac Teat Cristo monlŷy quiaj.

¹⁶Meáwan icon itepeayiŷn nop alinop, mŷŷŷch mapac imeajtsan. Aton meáwan noicnoic ajlŷy mondŷŷb Teat Cristo atepeayiŷw icon aton.

¹⁷Xecojow xechijquiaŷ, sasaj icon netam mejawan wŷx ajcŷwa nipilan leaw andiŷmŷw mayacŷw icon wŷx naél, mayacŷw moncŷy tiŷl icona. Ajcŷw ayaj ngo marangŷw atnej terquiaachayon wŷx. Icueatiŷn ajcŷw ayaj, nde mequiŷjpan. ¹⁸Cos ajcŷwa nipilan quiaj ngome minajiŷt Miteatiŷts Teat Cristo arangŷw; ajcŷw ayaj nejŷwan quiaj andiŷmŷw. Nejiw ajiŷrŷw nguineay mawŷyŷwŷyŷw nipilan; alndom mawaijchaw mondŷŷb Teat Cristo leaw nganaw majaw xeyay. ¹⁹Cos xeyay languaiyaran nguineay icona xeyay iyacan imeajtsan wŷx merangan andiŷm Teat Dios, pares apac ximeaats xeyay. Pero aton sandiŷm mexoman imeajtsan más xeyay wŷx irangan najneaj; ngo metam mexoman imeajtsan para merangan ngo majneaj. ²⁰Teat Dios aaga neech monajneaj tiŷl omeajtsaats, apmambeol icon mecŷŷjchiŷn tiŷt aaga Satanás. Miteatiŷts Teat Cristo mambeol icon, mŷŷch icon monojneaj.

²¹At aton atepeay icon teat Timoteo, nej nembeol xic wŷx aaga najiŷt sarang. At atepeayiŷw icon teat Lucio, teat Jasón, y teat Sosíater. Nejiw micual xefŷt aton.

²²At a xique Tercio nerangas aaga nawiig cam ocueaj teat Pablo, xique aton satepeay icon wŷx minŷt Teat Cristo.

²³At aton teat Gayo atepeay icon, xique aniŷng nej sacŷl. Aton aniŷng nej canchiŷjow meáwan monyar andeac Teat Cristo. At teat Erasto, nesap mitomiŷn aaga cambaj cam, atepeay icon aton; at teat Cuarto atepeay icon.

²⁴Miteatiŷts Teat Cristo mambeol meáwan icon. Amén.

Andondoch andeac, andeac najneajay wŷx Teat Dios

²⁵Nganŷy marangaats casa Teat Dios, masajaats najneaj arang, cos nej alndom mambeol icon mejawan más xeyay wŷx leaw tasajas icon, nguineay lamawŷn isoetiŷn Teat Jesucristo. Aag ayaj Teat Dios ngo mŷŷch nejinguind majaw aaga ayaj tanomb. ²⁶Pero nganŷy Teat Dios lamŷŷch icoots majawaats aag ayaj, cos mondeac andeac Teat Dios monlŷy tanomb tarangŷw wŷx nawiig. Nganŷy meáwan nipilan netam manguiaiŷw aag ayaj, cos Teat Dios almapac meáwan nŷt, y tapiŷng meáwan palpálwŷx ajlŷy nipilan netam manguiaiŷw andeac nej, marangŷw leawa nej andiŷm.

²⁷Pares apmarangaats casa Teat Dios meáwan nŷt, néjan quiaj nendŷy; masajaats najneajay arang wŷx minŷt Teat Jesucristo. Amén.